


NKUNA YA NIOKA

 Nzambi ya luzolo, Nzambi ya nene mpe ya ngolo, Yina salaka bima nionso na nzila ya ngolo ya Mpeve ya Yandi, mpe yina nataka Yesu Klisto, Mwana ya Yandi kaka mosi, Yina kufwaka ya ofele samu na beto bansumuki, Muntu ya mbote samu na bantu ya yimbi, samu na kuvutula beto na kati ya ngwisani ya mbote yina kele na beto mbala mosi diaka na Nzambi, mutindu Ndinga ya lusakumunu ke zonzaka na beto, ti beto vwandaka kintwadi na Yandi na ntuala ya mbatukulu ya yinza: “Na yina bambwetete ya suka vwandaka yimba kintwadi, mpe bana ya Nzambi ya babakala vwandaka sala miloolo, ntama kuna na mbatukulu ya yinza.” Yinki ke talisa beto ti ya vwandaka ve na ntangu yina kaka ti Mwana-dimeme kufwaka; ti ntangu Nzambi, na dibanza ya Yandi ya nene, monaka beto kusala miloolo mpe kuyangalala na mpulusu ya beto na nzila ya Yesu?

² Mpe, na nkokila yayi, beto ke kaka na ntomo ya ntete ya nkembo ya nene ya Nzambi yina ke monana na Kwizulu ya Yandi ya zole. Bimbevo mpe kiadi nionso ke vwanda diaka ve. Kuna beto ke kuzwa nzutu ya mutindu mosi na nzutu ya Yandi Mosi ya nkembo, samu ti beto ke mona Yandi mutindu Yandi kele. Awa na yina beto ke na kutalaka maboko ya beto kufutama, bansuki ya beto kukuma mpembe, mpe mapeka ya beto kulemba, beto zaba ti beto kele bayina ke kufwa mpe ti beto ke na kukwendaka na putulu na kisika yina beto me kulumusa bayintu ya beto na ntangu yayi, mpe kisika yina beto katukaka. Kasi, Mfumu Nzambi, mutindu kaka kieleka ti Nge kele Nzambi, Nge salaka nsilulu ti beto ke vumbuka na lufwa na bilumbu ya nsuka, mpe beto ke kwikila yawu.

³ Mosi na mosi ya beto me kwisa na lukwikilu na nkokila yayi na Ntwala ya Nge, beto me kwisa na kivuvu samu ti Yesu tubaka na beto na kusala yawu. Ya kele ve samu na kima ya mbote yina beto me sala, samu ti beto me salaka ata kima mosi ya mbote ve; kasi beto me kwisa ya kulemvuka, na kuzonzaka ti beto me kuzwa kima ya ntalu yayi samu na lemvo ya Yandi yina pesamaka na beto. Samu na yina, beto me kwisa kulomba ti Nge sakumuna beto na nkokila yayi na yina beto ke zonza Ndinga. Samu ti ya kele ya kusonama, ti, “Muntu ke zinga kaka ve na dimpa, kasi na konso Mpova yina ke katukaka na yinwa ya Nzambi.” Mpe bika ti yinwa ya Nzambi kuzonza na nkokila yayi. Bika bampova kubasika, mpe bika ti Yawu kukota mingi na kati ya bantima ya beto, bantu yina ke na kuwa, mpe kuvwanda ya kufuluka na Mpeve ya Nge mpe na Mvwandulu ya Nge. Samu ti beto me lombwa yawu na Nkumbu ya Yesu. Amen.

4 Bu—bubu yayi mpe mazono, to, mazono na nkokila, mpe bubu yayi, beto tubila dilongi, ntete, samu beto pesa yawu nkumbu, *Samu Na Yinki Beto Kele Denomination Ve*. Mpe beto vwandaka me zonzila yawu na ngolo nionso, samu na yinki beto kele denomination ve, mpe samu na yinki beto ke kwikilaka ve na ba-denomination. Samu ti, beto me tala yawu na kati ya Biblia, ti ata mbala mosi ve Nzambi salaka ba-denomination; ya kele diabulu salaka yawu; mpe beto me talisa yawu na nzila ya Biblia. Mpe ti, na nzila ya ba-denomination, kifu me basika. Ntangu yayi beto ke na kutubaka yayi samu na kusungika mpe samu na kunata tabernacle yayi na kintwadi pene-pene ya Ndinga ya Nzambi ya lusakumunu. Mpe, bivuvu ya beto kele ya kutelama ve na yina denomination ke tuba, to yina muntu nionso lendaka tuba; ya kele ya kutelama na zulu ya yina Mfumu Nzambi tubaka. Mpe ya kele kaka na nzila yina ti beto lenda vwanda ya kusungama mbote.

5 Mpe na suka yayi, mu bakaka tanu, mu banza, mambu ya mutindu yankaka yina basikaka na nzila ya denomination, ya kieleka ba me zonzila yawu ve na kati ya Biblia, yina mabuundu ya ba-Protestant ke na kutumamaka, mpe yina bawu ke na kulongisa mutindu malongi: kima mosi yina mama ya ntama ya kindumba, dibuundu ya Catholique ke longaka, mpe yina kele na kati ya dibuundu ya ba-Protestant. Mpe beto ke tumama na kima mosi yina kele ya kuswaswana na nionso yina kele na kati ya Ndinga ya Nzambi.

6 Dibuundu ya ntete ya nkumbu, beto talaka yawu na manima ya midi na disolo ya batata ya Nicée, ya dibuundu ya Nicée. Na manima ya lufwa ya bantumwa, kuna basikaka batata ya Nicée, mpe bawu landilaka na bamvula mingi. Na nsuka ya nkama tatu na makumi zole na tanu ya bamvula, bawu kwendaka na—na Nicée, na France, kisika bawu kuzwaka lukutakanu ya nene ya Nicée. Mpe kuna bawu salaka malongi yayi yina dibuundu ya Catholique kele na yawu ntangu yayi, mpe yina mpe pesamaka na ba-Protestant.

7 Mpe mutindu mu me tuba yawu na—na dilongi na suka yayi, “Mosi na mosi ya bansungi ya dibuundu yayi, tii na—na mbandu ya dibuundu ya Thessalonique, funda mosi na nkama tanu ya bamvula ya bansungi ya mudidi, ya vwandaka ata mbala mosi ve na kisika yina Yandi tubaka, ‘Nge kele diaka na Nkumbu ya Munu.’”

8 Mpe na lweka yankaka yayi, bawu vwandaka diaka ve na kati ya Klisto, bawu bakaka nkumbu ya denomination, “Catholique, Luther, Wesley, Baptiste, Presbyterien, Pentecote,” ya me landila mutindu yina.

9 Kasi kaka na ntwala ya nsuka ya nsungi, Yandi tubaka, “Mu me tula na ntwala ya nge kielo ya kuzibuka.” Beno me mona? Mpe ya kele nsungi yina beto ke na kukwikila ti beto kele na kati

ya yawu na ntangu yayi, nsungi ya kielo ya kuzibuka, na kati-kati ya nkwendolo ya nsuka ya dibuundu ya Laodicée.

¹⁰ Mpe ya kieleka na nkama tatu na makumi zole na tanu ya bamvula tii na concile ya Laodika. Mpe kuna bawu ndimaka mitindu yayi ya mutindu kulosa masa, kutiamuna masa, mpe bambotika ya luvunu, mpeve-santu ya luvunu, bima nionso yankaka yina. Bawu ndimaka yawu.

¹¹ Mpe na manima ntangu Luther, yina vwandaka nganga-Nzambi, basikaka na dibuundu ya Catholique, yandi nataka bima yayi na yandi. Mpe kuna me basika Zwingli, na Zwingli me basika Calvin, na Calvin me basika Wesley, oh, ya me landila mutindu yina. Mpe bawu me landila kaka na kunataka malongi yango. Mpe wapi mutindu Nzambi lendaka twadisa Dibuuundu ya Yandi, ntangu bawu ke na kulandila banzila yina Yandi pesaka ata mbala mosi ve ti bawu kulandila?

¹² Mpe beno bambuka moyo, na Apocalypse 17, beto me mona “kento.” Ntangu yayi bampova yayi kele pwelele. Ya kele ya kusonama na kati ya Biblia, na yawu mu banza ti mu lenda kutuba yawu. Ya me tuba ti kento yayi vwandaka “ndumba.” Yina zola tuba ti yandi vwandaka kento ya nkumbu ya yimbi; ti yandi zolaka vwanda ya kukwelana na bakala mosi, kasi yandi vwandaka sala kindumba na yinza. Mpe yandi vwandaka . . . Yandi vwandaka “MAMA YA BAKENTO YA KINDUMBA,” na yawu yandi vwandaka na bana ya bakento. Mpe beto me yema yawu landila géographie, ti ya vwandaka na . . . Mpe kuna, munu mosi, na kumonaka yawu na Masonuku, mu ke na kumonaka malongi ya yandi mpe bima nionso, mu ke kwikila ti Mfumu me tula yawu mbote-mbote na nzila, ti ya kele kima yankaka ve kasi dibuundu ya Catholique. Ya lenda vwanda kaka na nzila yayi. Mpe yandi butaka yinki? Mabuundu ya ba-Protestant. Kieleka, yawu yina yandi butaka.

¹³ Mpe yandi vwandaka na diboko ya yandi mbungu ya vinu ya bindumba ya yandi, mpe yandi vwandaka pesa yawu na bantinu ya ntoto. Mpe yandi vwandaka na luyalu ya ntoto nionso, na nzonzolo ya kimpeve. Mpe ya kieleka ya kele ya kulunga. Ya kele diaka ve . . .

¹⁴ Beno tala, bika ti, beto lenda kuvutuka na Daniel mpe kuzwa kifwani. Beno tala kifwani: yintu ya wolo, kimfumu ya Babylone; kisengo . . . to palata, ba-Mède na ba-Perse; kisengo, Alexandre ya Nene, mpe nionso yankaka yina, kimfumu ya ba-Grec; na manima bimfumu ya Rome, Rome ya Este mpe ya Weste, makulu zole.

¹⁵ Mpe beno tala na kati ya bimfumu kumi yayi, yina kele kieleka bibongo kumi yina beto vwandaka tubila na suka yayi, na mosi na mosi ya bimfumu kumi yayi yina zolaka telama, ya vwandaka kisengo na ntoto ya kuvukana. Mpe kisengo yina katukaka na makulu, yina vwandaka Rome. Mpe ya kele na

bukondi ya malongi ya Rome ya kuvukana na konso yinsi yina kele na nsi ya Mazulu, na nzila ya dibuundu ya Catholique. Ya kieleka ya kele ya kulunga. Mpe bawu zolaka kuvukana, kisika yankaka ve.

¹⁶ Mpe bawu fwana kukwelana, bawu na bawu. Biblia ke tuba ti bawu ke sala mutindu yina. Mpe beno tala bawu bubu yayi. Mwana ya beno ya bakala ke basika na mwana-kento ya Catholique; ntangu bawu ke baka lukanu ya kukwelana, bawu fwana sila na kuyundula bana ya bawu landila lukwikilu ya Catholique; beno me mona, mosi na yankaka. Beno me mona, ya kele samu na kubebisa ngolo ya yina yankaka.

¹⁷ Kasi yinki ya kele? Biblia me tuba ti kima ya muvimba kele ndumba. Ntangu yayi yinki beno ke sala? Ya kele ya mbote. Mpe wapi mutindu masumu ya bantu ke kuzwa kitumbu. . . Beto vutukaka na Deutéronome, mpe beto me talisa ti mwana ya makangu, mwana yina bibuti kele ya kukwelana ve, lendaka kukota ve na kimvuka ya Mfumu bansungi kumi na yiya. Yina vwandaka na nsi ya musiku. Mpe Klisto kwisaka samu na kukumisa musiku nene. Wapi mutindu ya kele ya kulutula ntangu yayi?

¹⁸ Mpe yinki ke na kusalamaka na bawu yayi, wapi diambu kele na mwa bantwenia ya bakento yayi ya kukondwa nsoni na balabala bubu yayi, mwa bakento yayi yina ke kunwaka makaya, mpe yina ke lwataka bakupe, yina ke zengaka bansuki, mpe nionso yina? Wapi diambu kele na bawu? Ya kele samu mama ya bawu salaka mutindu yina. Ba ke pesa kitumbu, disumu ya nkú, katuka nsungi mosi na yankaka. Yawu yina. Mpe wapi kisika beto me kuma? Beto me kuma na kisika, ya kele kaka kuvukisa ya disumu ya mvindu.

¹⁹ Ya ke samu na yina Nzambi me telemisa Russie, kuna, na bombe atomique samu na kufwa yandi, mutindu ya vwandaka ya kifuluka na masa na bilumbu me luta, ntangu Yandi telemisaka matuti. Kieleka, Yandi salaka yawu. Mpe Biblia me tuba mutindu yina. Russie, na yina ba kele yinsi yina ke kwikilaka na Nzambi ve, bayina ke kwikilaka Nzambi ve, ya kieleka ya ke kaka kisadilu na maboko ya Nzambi ya Ngolo. Mutindu kaka Ntinu Nebucadnetsar zolaka kufwa Israël samu ti bawu tambulaka na Nzambi ve, Russie ke na kutelamaka samu na “kuvutula yimbi yina salamaka na basantu,” ya dibuundu ya Catholique, samu na menga yina ya basantu yandi mwangisaka. Biblia me tuba mutindu yina. Yawu ke baka kima ya muvimba.

²⁰ Na yawu beno tala awa, kana mama ya bawu vwandaka kento yina vwandaka kina na banganda, mpe nkooko ya bawu ya kento, mpe ti mama ya yandi vwandaka ntwenia ya kento ya kukondwa nsoni, yinki yandi kele bubu yayi? Yina ke katulaka bilele na kukinaka rock-and-roll. Yinki ke vwanda bana ya yandi?

Mpe beno ke tuba, “Ya kele Nzambi ke salaka yawu?” Yinga, tata.

²¹ Nzambi ke pesaka kitumbu na disumu ya nkú ya bana, nsungi, tii na bansungi kumi na yiya. Mpe kana Klisto kwisaka samu na kutandula yawu, beto lendaka tuba, “Bansungi nkama, to bansungi nkama tanu.” Beno tala, Yandi tubaka, “Bakuluntu, beno kuwaka ti ba tubaka na bawu, na bakuluntu, ‘Kufwa muntu ve.’ Munu ke tuba, ‘Nge, yina ke vwanda na makasi samu na mpangi-bakala, kukondwa kikuma, yandi me kufwa mpangi dezia.’ Beno kuwaka ti ba tubaka na bawu, na bakuluntu, ‘Kusala pité ve.’ Kasi Mu ke tuba ti yina ke tala kento samu na kulula yandi, ya me sala dezia pité.” Yandi salaka yawu. . . Yinki kele *kutandula*? “Kukumisa yawu bambala mingi nene.” Mpe kana na nsi ya musiku ya vwandaka bansungi kumi na yiya, bantangu yikwa yawu ke baka diambu mosi yango bubu yayi?

²² Mpe bantwenia ya babakala, mpe babakala yina me kuma bambuta, mpe babakala ya kukwela kele diaka ve na luzitu na ndefi ya bawu ya makwela. Oh, bawu ke baka kaka bakento mpe ke zinga na bawu konso kisika yina, mpe kaka mutindu bayimbwa ya kidi-kidi. Yimbwa me lutila luzitu mpe me lutila bankadulu ya luzitu na bantu yankaka. Mpe mu zaba ti yayi kele ngolo mingi, kasi ya kele ya kieleka.

²³ Samu na yinki? Mpe mabuundu ke landila na kukwenda na ntwala mpe ke tuba kima mosi ve na yawu. Samu na yinki? Bawu ke na kusalaka kaka mutindu mama ya bawu kusalaka. Mabuundu ke byadila yawu. Samu ti, dibuundu mpe dibuundu yango ya ba-Protestant basikaka na dibuundu ya Catholique, ba ke pesa kitumbu ya masumu ya dibuundu ya Catholique na zulu ya ba-Protestant. Kieleka, ya kele, mutindu nzungu lenda ve kutuba na chaudron ti ya ke “mvindu.” Ya kieleka mpenza.

²⁴ Awa beto me mona, mpe na kati ya Masonuku, beto me mona. . . Mpe mu me mona ata noti ve na zulu ya mesa awa na nkokila yayi. Mu tubaka, “Beni talisa na munu kisika mosi Nzambi salaka denomination. Beni talisa na munu kisika mosi Nzambi tulaka mulongi ya kento. Beni talisa na munu kisika mosi Nzambi pesaka muswa na mwa kumwangisa ya masa. Beni talisa na munu kisika mosi Nzambi pesaka muswa na kutiamuna masa. Beni talisa na munu kisika mosi Nzambi kuzwaka muntu yina bakaka mbotika na nkumbu ya ‘Tata, Mwana, Mpeve-Santu.’ Beni talisa na munu bima yango.” Mpe ntangu nionso beto ke na kulandilaka na kusala yawu. Ya me kota na kati ya dibuundu.

²⁵ Awa, mu tubaka, “Landila mutindu ya beno ya kubanza beto lenda vwanda ve ba-Baptiste, samu ti beto ke kwikilaka ti bawu bakaka mbotika na Nkumbu ya Mfumu Yesu Klisto. Ya kele ata na muntu mosi ve, na kati ya Biblia, yina bakaka mbotika na mutindu yankaka. Beni talisa na munu kisika muntu mosi

kuzwaka mbotika na nkumbu ya ‘Tata, Mwana, Mpeve-Santu,’ mu ke telemisa maboko ya munu mpe mu ke tuba ti mu kele profete ya luvunu.”

²⁶ “Mpe kana Biblia ke tuba ti beno fwana ‘kubotama na Nkumbu ya Yesu Klisto,’ yina zola tuba ti beno fwana sala yawu mutindu yina. Paul tubaka na bawu na kubaka diaka mbotika. Ata yinki mutindu bawu bakaka mbotika, bawu zolaka kwisa, kubaka diaka mbotika. Bawu bakaka mbotika na nzila kaka ya muntu yina botikaka Yesu Klisto; Jean Mubotiki. Yandi tubaka, ‘Yina ke simba diaka ve. Beno fwana kwisa, kubaka diaka mbotika.’ Mpe bawu zolaka kusala yawu na ntuala bawu kuzwa Mpeve-Santu. Ya vwandaka manaka ya Nzambi.”

²⁷ Mu lendaka kwenda ntama mingi diaka, na nkokila yayi. Samu na yinki? Yesu ke kangamaka na Ndinga ya Yandi. Beno ke kwikilaka yawu? Mbote, na kutala beno nionso vwandaka awa na suka yayi, kasi mu zola tuba diaka mwa mingi na zulu ya yawu.

²⁸ Samu na yinki Paul kutu-... tubaka yawu na manima ti yawu vwandaka me salama? Paul tubaka, “Ata ti Wanzio me katuka na Zulu kukwisa mpe longa kima yankaka, bika ti yandi vwanza ya kusingama.”

²⁹ Ntangu yayi beno ke tuba, “Beto me kuzwa Nsemo ya malu-malu na zulu ya yawu.” Ve, beno me kuzwa yawu ve. Yawu yina diabulu nataka na Eve, Nsemo ya malu-malu. Beno ke na nsatu ya Nsemo ya malu-malu ve. Beno ke na nsatu ya kutambula na Nsemo yina Nzambi pesaka dezia awa, yimeni.

³⁰ Ntangu yayi beno tala yayi mbote, mutindu ya kele mpasi ve. Ntangu bawu katukaka na Mongo ya Nsobolo, Yesu tubaka, na bilandi ya Yandi, “Yinki bantu ke tuba ti Mu Mwana ya Muntu kele?”

“Mosi ke tuba ti Nge kele ‘Moïse, to Elie, mosi ya baprofete.’”

Yandi tubaka, “Yinki beno ke tuba?”

³¹ Yandi tubaka, Pierre tubaka, “Nge kele Klisto, Mwana ya Nzambi ya moyo.”

³² Yandi tubaka, “Kiese na nge, Simon, mwana ya Jonas; samu ti nsuni na menga ve me monikisa yayi na nge.” Beno me mona, yayi me katuka na seminere ve. Yayi me katuka na badenomination ve. “Nsuni na menga ve me monikisa yayi na nge. Ata mbala mosi ve ti beno ke longoka yayi na lukolo ya luzabu ya kimuntu. Kasi Tata ya Munu, yina kele na Mazulu, me monikisa yayi na nge. Mpe na zulu ya ditadi yayi Mu ke tunga Dibuundu ya Munu; mpe bamwelo ya difelo ke mwangisa yawu ve,” luzayikisu ya kimpeve ya Nani Yandi kele.

³³ Beno tala mbote, “Mpe Munu ke tuba na nge ti nge kele Pierre. Mpe Munu ke pesa nge bafungula ya Kimfumu. Mpe nionso yina nge ke kanga na ntoto, Munu ke kanga yawu na

Mazulu; nionso yina nge ke zibula na ntoto, Munu ke zibula yawu na Mazulu.” Awa, ya lungaka ti Yandi kukangama na Ndinga ya Yandi kana ve Yandi vwandaka Nzambi ve. Ntangu yayi, mpe ntangu Yandi salaka yawu, na manima ya mwa bilumbu, ba komaka Yandi na kulunsi, vumbukaka na bafwa, kwendaka na Mazulu, mpe Pierre me fungula Nsangu ya mbote na Kilumbu ya Pentecote. Yandi salaka yawu? Yandi, kieleka, yandi salaka yawu. Ntangu yayi beno tala mbote, ntangu yandi. . .

³⁴ Bawu nionso vwandaka vweza bawu, samu ti bawu vwandaka ya kifuluka na Mpeve. Ba vwandaka bokila bawu “ba eretiki, ba-exalté,” to nkumbu mosi ya mutindu yina. Mpe bawu vwandaka seka, mpe vwandaka tuba, “Bantu yayi me lawuka malafu.”

³⁵ Kuna Pierre telamaka na kati-kati ya bawu, zangulaka ndinga, mpe yandi tubaka, “Babakala mpe bampangi, beno kuwa ndinga ya munu. Beno kuwa bampova ya munu mpe beno kuwa munu. Bantu yayi me lawuka malafu ve mutindu beno ke na kubanza; yayi kele ntete ngunga ya tatu ya kilumbu. Kasi yayi kele yina zonzamaka na nzila ya profete Joël, ‘Mpe ti ya ke salama na bilumbu ya nsuka, ti Mu ke mwangisa Mpeve ya Munu,’ mpe yina Yandi ke sala na zulu ya bana ya Yandi ya babakala, mpe ya bana ya Yandi ya bakento, mpe bisadi ya Yandi ya bakento, mpe nionso yina, na kilumbu yango.”

³⁶ Mpe na yina bawu bandaka na kuwa yayi, bantima ya bawu kulwalaka. Samu ti, bawu vwandaka kuwa muntu yina zabaka ve ABC ya yandi, kasi bawu zolaka kulanda yandi mbote, na kuzabaka ti yandi vwandaka na Kima na kati ya yandi, yina vwandaka pelisa yandi, Mpeve-Santu. Kusakisa yandi? Kasi, ya ke vwanda mutindu kumeka kufwa tiya, na yinzo ya nene ya kuyuma, na kilumbu ya mupepe. Beno lenda sala yawu ve. Yandi vwandaka ya kifuluka na Mpeve-Santu. Mpe yinki yandi salaka awa?

³⁷ Bawu tubaka, “Mbote, babakala mpe bampangi, yinki beto lenda kusala samu na kuvuluka?”

³⁸ Ntangu yayi beno tala mbote, Pierre, nge kele na bafungula ya Kimfumu. Beno me mona?

³⁹ Ntangu yayi, ntangu Yesu vumbukaka na bafwa na kilumbu ya tatu, Yandi vwandaka ve na bafungula ya Kimfumu ya Mazulu. Beno zaba yawu? Yandi tubaka, “Mu ke na bafungula ya lufwa mpe ya difelo,” kasi ya Kimfumu ve, samu ti ba pesaka yawu na Pierre.

⁴⁰ Awa Yandi tubaka, “Pierre, nionso yina nge ke zibula na ntoto, Munu ke zibula yawu na Mazulu. Yina nge ke kanga na ntoto, Munu ke kanga yawu na Mazulu.”

⁴¹ Ntangu yayi awa yandi me telama na bafungula, samu na kufungula kima yango ya lusakumunu na yinza. Mpe awa yandi ke na bafungula na diboko ya yandi. Mpe bawu ke na

kuyufulaka, “Yinki beto lenda kusala samu na kuvuluka?” Awa, ata nionso yina ntumwa tubaka na kusala, Nzambi zolaka kuzaba yawu na Mazulu, kana Yandi pesaka yandi lutumu yina.

⁴² Kuna Pierre me tuba, “Beno balula bantima, mosi na mosi ya beno, mpe beno botama na Nkumbu ya Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu.” Ya kieleka? Mpe ya kele samu na yina bafungula balukaka ve na Mazulu na nkumbu yankaka, na fwaso yankaka, na mutindu yankaka—na mutindu yankaka. Ya me baluka na ntoto, mpe ya me baluka na Mazulu, to Yesu zitisaka ve Ndinga ya Yandi na Pierre. Mpe bisika nionso na kati ya Biblia bawu botamaka, na manima ya yina, bawu botamaka na Nkumbu ya Yesu Klisto. Mpe bayina botamaka na ntwala ya yawu, zolaka kwisa mpe kubotama diaka, na Nkumbu ya Yesu Klisto, samu na kuzwa Mpeve-Santu. Yayi kele yina kele ya kulunga. Ya kele diaka mutindu mosi.

⁴³ Na yawu, kana beto ke na kulongaka mbotika na nkumbu ya “Tata, Mwana, mpe Mpeve-Santu,” ya kele profesi ya luvunu. Ntangu yayi mu zola kuniongisa beno ve, kasi mu fwana kukotisa yayi mbote samu ti dibuundu yayi kuzaba yinki ya kele. Beto kele awa ve mutindu nkonga ya bantu ya bazoba ya bulawu; beto zaba kisika beto me telama na Ndinga ya Nzambi. Beno me mona, beto zaba. Mu ke lomba na muntu nionso na kulakisa muntu kisika muntu botamaka na nkumbu ya “Tata, Mwana, Mpeve-Santu.” Ntangu yayi beno ke kuwa profesi ya luvunu to ya Kieleka? Beno tala Masonuku. Ya me tala beno.

⁴⁴ Beno talisa na muntu kisika muntu na kati ya Biblia, kisika ya pesamaka muswa na dibuundu na kuvwanda denomination na kati ya—na kati ya Biblia. Beno lakisa muntu na kati ya Biblia kisika ya pesamaka muswa na mulongi ya kento. Beno talisa na muntu na kati ya Biblia kisika bima nionso yayi, yina beto ke na kuzonzilaka, pesamaka muswa na kati ya Biblia. Ya kele kuna ve. Beno pesa muntu kisika mosi. Beno kwenda na denomination . . .

⁴⁵ Mbote, ntangu ba-Methodiste telamaka, bawu longaka kusantisama. Ya kele mbote. Kasi, ntangu bawu salaka yawu, bawu salaka denomination, mpe yina sukisaka yawu. Ya kele samu na yina Biblia tubaka, “Nge kele na nkumbu.”

Beno ke tuba, “Mu kele Muklisto.”

“Mbote, wapi kele denomination ya beno?”

⁴⁶ Beno ke tuba, “Methodiste,” mbote, kuna beno kele ndumba. “Mu kele Baptiste,” ndumba. “Ya Pentecote,” nge kele ndumba. Beno kele ya dibuundu yina.

⁴⁷ Beno fwana vwanda ya Klisto. Beno ke kuzwa kima mosi ve na kutubaka, “Methodiste,” “Baptiste.” Kana beno kele Muklisto, beno kele Muklisto na kati ya ntima.

48 Mosi na mosi ya ba-denomination yayi lenda kubasisa bana, bana ya Nzambi, yina kele kieleka. Kasi ntangu beno ke banza ti beno ke kwenda na Zulu kaka samu ti beno kele Methodiste to Baptiste, beno me tuba luvunu. Mpe ya kele samu na yina beto kele na nganda ya kima yina.

Samu na yinki ba-Baptiste lenda mona ve?

49 Mu yufulaka muntu mosi ya Methodiste awa, yina vwandaka sonika dibanza ya malongi, diambu yina ba sonikaka ntama. Yandi tubaka, “Kima kaka mosi yina beto ke zolaka ve na nge, nge ke vwandaka na bantu ya Pentecote.”

Mu tubaka, “Nani kele ‘beto’?”

“Beto, ba-Methodiste.”

50 Mu tubaka, “Mbote, mu ke zabisa nge yinki mu ke sala. Mu ke kwisa na mbanza ya beno mpe ti beno bika ba-Methodiste kutuma yawu.”

“Oh,” yandi tubaka, “kieleka, beto lenda ve kusala yawu.”

51 Mu tubaka, “Ya kele kaka yina mu vwandaka banza. Mu ke vwanda na bantu ya Pentecote samu ti bantu ya Pentecote ke kwikilaka yawu. Ya kele kieleka. Bawu ke sadisaka yawu. Ba kele bayina ke kuzwaka ndandu ya mbote ya yawu.”

52 Bantu yikwa tangaka zulunale ya magazine *Life*, kaka ntama mingi ve, na yina me tala dibuundu ya Pentecote? Ya kele mosi ya diambu ya ngitukulu na nsungi yayi. Bawu me kuzwa na mvula mosi bantu mingi yina me kwikila kulutila mabuundu nionso yankaka ya kuvukana kintwadi. Samu na yinki? Ata bafoti ya bawu, Nzambi ke na kunataka bawu na ntwala, samu ti bawu ke na kukwila Kieleka mpe ke na kulandilaka na kutambula na Yawu. Ya kele Kieleka.

53 Kasi yinki beto ke na kusalaka ntangu yayi? Beno me mona? Ya kele samu na yina beto kele denomination ve. Mpe kieleka kaka mutindu Pentecote ke na kusalaka denomination . . .

54 Mpe ntangu kuna na ntama, ntangu Mpeve-Santu mwanganaka na dibuundu ya Pentecote, bamvula kumi na yiya, mpe ti bawu bandaka na kuzonza na bandinga, mosi ya makabu. Yina kele ya kulutila fioti ya makabu. Yina kele fioti ya makabu, landila Santu Paul, kele kuzonza na bandinga ya malu-malu. Mpe kaka ntangu yina yawu kubwaka, “Oh,” bawu tubaka, “beto me kuzwa Yawu ntangu yayi,” mpe bawu me sala denomination, Lukutakanu ya Nene, yina kele ntangu yayi ba-Assemblée de Dieu. “Oh, muntu ve kele na Yawu kana ti nge kutuba na bandinga,” mpe kaka kuna Nzambi katukaka na bawu, mpe me bika bawu kuna. Ya kieleka. Yinga, tata.

55 Kuna me kwisa ba-Unitaire, mpe me bakula mbotika na Nkumbu ya Yesu. Bawu tubaka, “Oh, beto me kuzwa Yawu,” bawu me sala organisation. Yinki bawu salaka? Nzambi kaka kuna me katuka mpe me bika bawu kuna.

Ya kele samu na, “Konso muntu yina me zola, bika ti yandi kwisa.”

⁵⁶ Beno me mona, ba-Unitaire lenda ve kukwenda na ba-Assemblée. Ba-Assemblée lenda ve kukwenda na ba-Unitaire. Mu zonzaka na bantu ya mbote ya bawu, Tata Goss, mpe na Docteur Pope, mpe na mingi. Bantu yina kele bantu ya nene ya . . . Mu vwandaka na bawu. Mu tubaka, “Wapi mutindu beno bantu ya mayele, lendaka longisa yayi kidimbu ya ntete?”

⁵⁷ “Mbote,” bawu tubaka, “Mpangi Branham,” mosi, zole to tatu ya bawu, vwandaka kieleka ya kusungama, bawu tubaka, “beto zaba ti ya kele luvunu, kasi yinki beto lenda sala? Kana beto tuba kima mosi na yina me tala yawu ntangu yayi, oh, ya ke bebisa manaka nionso.” Kieleka, mpe beno ke vwanda diaka ve évêque, to kuluntu ya nene. Dibanza kele yina.

⁵⁸ Mpangi-bakala, mu ke zola mingi ti mu kuzwa kisalu ya fioti na nsongi, to kulonga na nsi ya yinti ya pin, mpe kuvwanda na Kieleka, ya kieleka, mpe kuzaba ti nge ke na kutubaka Kieleka. Muntu ke na nsatu ya Kieleka. Mpe beno fwana, na kuvwandaka Muklisto, kupesa kimbangi ya Kieleka. Nzambi ke tula yawu na zulu ya beno.

⁵⁹ Kuna, samu na bima yayi, kana beno bakaka mbotika na Nkumbu ya Yesu Klisto ve, mpe ti beno kusalaka bima yayi ve, mpe ti beno kuzwaka Mpeve-Santu ve . . .

⁶⁰ Beno ke tuba, “Oh, mu tubaka na bandinga ya malu-malu.” Yina zola kuzonza ve ti beno ke na Mpeve-Santu.

⁶¹ Mu monaka bandoki ya bakento, bandoki ya babakala, bampeve ya yimbi, mpe nionso yankaka yina, kuzonza na bandinga ya malu-malu. Ya kieleka. Ba ke na Mpeve-Santu ve, mpe beno zaba yawu. Ba ke kunwa menga ya mukwa ya yintu ya muntu, mpe ke kina, mpe ke sambila diabulu, mpe ke zonza na bandinga. Ya kieleka. Ba ke na Mpeve-Santu ve.

⁶² Na yawu, samu beno me tuba na bandinga, yina zola zonza ve ti beno ke na Yawu. Mutindu ke kaka mosi samu na kuzaba ti beno ke na Yawu, ya kele ntangu mpeve ya beno ke pesa kimbangi na Mpeve ya Yandi, mpe ti bambuma ya Mpeve ke vwanda na beno: zola, lukwikilu, kiese, ngemba, mvibudulu, mambote, mawete, lutondo. Ya kele na yina beno ke zaba ti beno kele na Mpeve-Santu. Ya ke pesaka kimbangi ya Yawu mosi.

⁶³ Ntangu yayi, na yina beno ke meka na kutelama kuna, samu ti beno kele ya ba-Assemblée, to ya ba-Baptiste, to ya ba-Presbyterien, beno me mona yinki beno ke na kusalaka? Beno ke na kubakaka nkumbu ya ndumba. Ya kieleka ya kele ya kulunga. Beno basika na kima yina. Beno vwanda ntama na yawu. Mu zola tuba ve ti beno kubasika na dibuundu ya beno to nionso yina; beno sala yina beno zola kusala na yawu. Kasi beno kusuka na kutelamaka na, “Oh, mu kele Presbyterien. Beto ke kwikilaka ve na bilumbu ya bimangu.” Samu na yinki beno ke kwikila ve

na yawu? Biblia ke longaka yawu. “Oh, mu kele ya Dibuundu ya Klisto. Bawu ke tubaka ti bilumbu ya bimangu ya lutaka.” Ba kele baprofete ya luvunu.

⁶⁴ Mu lenda lakisa beno kisika Yesu Klisto pesaka Ngolo na Dibuundu, samu na kubelusa bambevo, mpe kuvumbula mafwa, mpe kubingisa bampeve ya yimbi. Mu ke lomba muntu nionso na kulakisa munu na Masonuku na kati ya Biblia kisika Yandi katulaka yawu na Dibuundu. Yinki me katula yawu? Ba-credo ya beno, kieleka, Ndinga ya Nzambi ve. Mpeve-Santu ke na kutatamanaka na kusala kisalu, ke na kulandilaka kaka mutindu mosi, mpe Yandi ke sala yawu ntangu nionso.

⁶⁵ Ya kele samu na yina beto kele denomination ve, “Bawu ke talisa ti bawu kele ya kukwikama na Nzambi, kasi bawu ke manga Ngolo ya yawu; vwanda ntama na bantu ya mutindu yina.” Beto ke kwikilaka ve na bima ya mutindu yina.

⁶⁶ Ntangu yayi, wapi mutindu yawu kubandaka? Beto fwana sala nswalu samu na kutala yawu na nswalu nionso ntangu yayi, mutindu yawu kubandaka. Ntangu yayi beto ke na Masonuku mingi ya kusonama awa na yina me tala Mpeve-Santu.

⁶⁷ Mpe kima mosi diaka, beto lombaka mazono na nkokila, na “kukanga ntima ya basantu,” na mutindu ba-Baptiste ke kwikilaka yawu ve. Ve, tata. Kieleka mu ke ntima mosi ve na ba-Baptiste mpe na dibanza ya bawu, na dibanza ya bawu ya Calvinisme. Kieleka mu ke wisana ve na ba-Presbyterien. Mu kele wisana ve na ba-Methodiste na mutindu ya bawu ya kutala malongi ya ba-Arminien. Yinga, tata. Kasi bawu zole kele na kieleka, kasi beno fwana kuvutula yawu *Awa* kisika ya kele Kieleka. Ntangu beno ke basika kuna na kutinaka, beno ke kuma kilawu na yawu. Kieleka.

⁶⁸ Ba-Baptiste me kwisa, me botika ndambu ya bawu awa, na kukotisaka bawu na kati ya masa; mpe mulongi me botika bawu, yivwa na zulu ya kumi ya bawu ke kunwa makaya, ke basika mpe ke vwanda kuna, mpe ke bula bakalati, ke bula loto mpimpa nionso, bawu ke kwenda bisika nionso, mpe ke sala mumbongo ya luvunu; mpe bakento nionso ya kulwata bakupe na nganda awa, ke tambula bisika nionso na babala-bala, mpe ke zenga bansuki ya bawu, mpe—mpe ke kunwa makaya mpe ke vwanda na kuzonza, mpe ke sala mwa balukutakanu ya ntungulu ya bilele, mpe ke tuba mambu ya yimbi. Beno ke bokila yina Kimuklisto? Mpe beno ke banza ti beno ke na nkebolo ya Seko? Beno ke kwenda na difelo mutindu yina. Na mutindu nionso beno ke sepela ve na Zulu. Kieleka ve. Yina kele nkebolo ya Seko ve.

Kasi ntangu muntu me butuka mbala zole na Mpeve-Santu. . .

⁶⁹ Mpe beno ba-Pentecotiste, samu ti beno ke dumuka mpe ti beno ke kubwa, ti beno ke zonza na bandinga, ti beno ke kwenda

na zulu mpe ke kulumuka na allée, yina zola zonza ve ti beno ke na lukengolo ya Seko. Beno tula yawu ata mbala mosi ve na kati ya yintu ya beno. Ve, tata. Kieleka ya kele yawu ve. Samu ti, beno zaba ti luzingu ya beno mosi—ya beno mosi ke zabisa beno yawu, yawu ke pesa kimbangi, ti beno kele ya kusungama ve na Nzambi. Ya kele kieleka. Beno kele ya kusungama ve. Yina kele ntete ve, na lukengolo ya Seko.

⁷⁰ Kasi mu zola kuyufula beno kima mosi. Nkebolo ya Seko ya kele? Biblia me tuba yawu. Biblia ke tuba ti bankumbu ya beto kele ya kutula na Buku ya Luzingu ya Mwana-dimeme na ntwala ya mbatukulu ya yinza.

⁷¹ Mutindu mu tubaka yawu na suka yayi, mu ke tuba diaka yawu. Muntu yina sonikaka mukunga, “Ya kele na nkumbu ya malu-malu ya kusonama na Nkembo na nkokila yayi, mpe ya kele ya munu,” dibanza ya yandi vwandaka mbote, kasi yandi vwandaka na kifu, landila Masonuku. Nkumbu ya beno kutulamaka ve na mpimpa yina beno vulukaka.

⁷² Nkumbu ya beno, landila Biblia, landila Apocalypse 13, 17, mpe nionso yina, “vwandaka ya kutula kuna na ntwala ya mbatukulu ya yinza; mpe Yesu Klisto kufwaka na ntwala ya mbatukulu ya yinza.”

⁷³ Wapi mutindu Nzambi, Yina kele ya seko, wapi mutindu Nzambi ya kukondwa seko, lendaka zaba nsuka kuna na mbatukulu, wapi mutindu Yandi pesaka muswa na disumu na kwisa na zulu ya ntoto, kana ya vwandaka na kikuma ve?

⁷⁴ Kaka samu na kukotisa mbote ntangu yayi mwa bima yayi yina beto vwandaka tuba. Yinki vwandaka ntete, Mvulusi to nsumuki? [Muntu mosi na kati ya kimvuka me tuba, “Mvulusi.”—Mu.] Mvulusi, kieleka. Nani ke na ngolo ya kulutula, Mvulusi to nsumuki? Kana Mvulusi lenda katula disumu, Yandi kele ya kulutula ngolo. Mbote, samu na yinki Yandi bikaka ti disumu kuvwanda ntete? Samu na katalisa ti Yandi vwandaka Mvulusi. Nani ke na ngolo ya kulutula, munganga to kimbevo? [“Munganga.”] Munganga. Na yina samu na yinki Yandi bikaka ti kimbevo kukwisa? Samu na kulakisa ti Yandi vwandaka munganga. Mu ke kukimona musambidi ntangu yayi. Yinga, tata. Oh, la la! Yawu yina Yandi kele.

⁷⁵ Ya kele samu na yina Yandi ke bikaka ti bampasi kukuma. Yawu yina Yandi ke bikaka ti mawa kukuma, samu na kulakisa ti Yandi kele kiesee. Kieleka, ya ke mutindu yina. Ya ke samu na yina ti beto ke na mpimpa, samu na kulakisa ti ya kele na mwini. Ya ke samu na yina beto ke na makasi, samu na kulakisa ti ngemba kele. Kieleka, ya ke na mbote mpe yimbi. Oh, Yandi kele mbote mingi.

⁷⁶ Ntangu yayi, wapi mutindu yawu bandaka? Beto ke baka yawu na ntangu yayi, na nswalu nionso beto lenda, samu mu

kanga beno mpimpa nionso ve. Ntangu yayi, bima nionso fwana vwanda na mbatukulu.

⁷⁷ Mpe mu zola kuyufula beno kima mosi. Ntangu yayi yayi lenda . . . Beno lenda kotisa yayi na poketi ya kazaka ya beno. Beno kele ya kukwika ve samu na kutula yayi na madia ya ntangu nionso. Kasi beno kuwa yayi.

⁷⁸ Kana nge kele kigangwa ya Seko, kuna ata mbala mosi ve nge kuzwaka mbatukulu, to ata mbala mosi ve ti nge lenda kuzwa nsuka. Samu ti, *Seko* me katuka na mpova “yina ke na mbatukulu to nsuka ve.”

⁷⁹ Beno ke na kubambuka moyo na yawu ve? Mu vwandaka tuba, na suka yayi, ti wapi mutindu Melchisedek, ntangu yandi kutanaka na Abraham yina katukaka na mvita ntangu yandi nungaka bantinu. Mpe Biblia ke tuba, na Hebreux 7, ti—ti, “Levi futaka mosi ya kumi na Melchisedek, na yina yandi vwandaka na luketu ya tata ya yandi Abraham.” Abraham butaka Isaac; Isaac butaka Jacob; Jacob butaka Levi. Yina vwandaka tata, nkooko ya bakala, mpe nkooko ya nkooko ya bakala. Mpe na yina Levi vwandaka na kati ya menga ya nkooko ya nkooko ya bakala, Biblia me zitisa yandi na kufutaka mosi ya kumi na Melchisedek. Beno ke tubila ya Seko! Oh, la la! Yandi tubaka ata mbala mosi ve, “Yandi salaka yawu na kivudi; yandi salaka yawu ndambu.” Biblia ke tuba ti, “Yandi futaka kikunku ya kumi.” Amen.

⁸⁰ Na yina, kana beto me katuka na nkuna ya mbote, ntangu Paul longaka Nsangu ya mbote mu vwandaka kuna mpe beno vwandaka kuna. Beto ke kota na yawu, na minuti fioti, kukotisa yawu mbote na makutu ya beto. Beno tala, ya kele yina Masonuku ke tuba, na beto, ya me vutuka ntama mingi.

⁸¹ Beno banza ntete! Levi; na manima Jacob, tata ya yandi; na manima ya Isaac, tata ya yandi; na manima Abraham, tata ya yandi; nkooko ya nkooko ya yandi ya bakala. Na yina Levi vwandaka na luketu ya nkooko ya nkooko ya yandi ya bakala, yandi futaka mosi ya kumi na Melchisedek.

⁸² Mu zola yufula beno. Ya me tala nani, Job 27 . . . 38, na yina Yandi tubaka, “Wapi kisika nge vwandaka ntangu Mu vwandaka sala ntoto? Ntangu bambwetete ya suka vwandaka yimba kintwadi, mpe bana ya babakala ya Nzambi vwandaka sala miloolo?” Banani vwandaka bana ya babakala yango ya Nzambi yina vwandaka sala miloolo? Yesu tubaka na bawu, ti, “Mu vwandaka sepela na beno na ntwala ya mbatukulu ya yinza.” Beto kele bigangwa ya ntangu ve. Beto kele bivangu ya Seko.

⁸³ “Muntu ve lenda kwisa na Munu, kana Tata ya Munu kubenda yandi ve. Mpe bayina nionso ke kwisa na Munu, Mu ke pesa bawu Luzingu ya Kukonda nsuka, mpe ke vumbula yandi na bafwa na bilumbu ya nsuka. Muntu mosi ve lenda botula

bawu na diboko ya Tata ya Munu, Yina pesaka Munu bawu.”
Wapi mutindu beno ke zimbana?

⁸⁴ Beno me mona, beno ke na kubanga. Beno ke na boma. Beno ke kwenda bisika nionso awa. Mpe yina kele mosi ya bidimbu ya nene, na kati ya yinza, beno me kuma kisika yankaka ntete ve. Ya kieleka. Wapi mutindu Nzambi lendaka vulusa beno kana Yandi . . .

⁸⁵ Bantu yikwa na kati ya dibuundu yayi lenda telemisa maboko, mpe kukwikila ti Nzambi kele ya seko? Beno zaba yinki zola tuba mpova yayi *seko*? Ya kele ya kulunga. Kukondwa-nsuka, beno lenda ve—beno lenda ve kubangula mpova yayi *seko*.

⁸⁶ Beno me bongisaka ntete kamera ya beno na seko? Mbote, ya zola kaka kutuba nionso yina ke landa katuka na manima. Mbote mingi. Ya kele na mutindu yankaka ve ya kukangimisa yawu diaka.

⁸⁷ Mbote, ya kele yina Nzambi kele. Yandi kele ya kukondwa-nsuka. Mpe kana Yandi kele ya kukondwa-nsuka, ya lendaka vwanda na dimeme ve, na nzinzi ve, na dikasa ve, na sidi ve, na ntunga ve, to kima yina vwandaka ntete na zulu ya ntoto, to yina ke vwanda, kasi yina Nzambi zabaka ntete ntete yinza kuvwanda. Beno tala yina kele mwa mutindu ya kusala ya kukondwa-nsuka.

⁸⁸ Mbote, na yina, Nzambi ya seko Yina vulusaka beno awa, na kuzabaka ti Yandi ke zimbisa beno na lumingu ke kwisa, to ngonda yina ke kwisa, to mvula yina ke kwisa, beno tala, Yandi ke kondwa kikuma ya kieleka. Yandi lenda ve kuzimbisa beno. “Muntu yina ke kuwaka Bandinga ya Munu, mpe ke kwikilaka na Yandi yina tindaka Munu, ke na Luzingu ya kukonda nsuka mpe yandi ke luta na Lusambusu ata fioti ve, kasi yandi me katuka na lufwa na Luzingu.” Yandi lenda ve. Beno kele diaka ve . . .

⁸⁹ “Yandi yina me butaka na Nzambi ke salaka disumu ve; samu ti nkuna ya Nzambi ke zingaka na kati ya yandi, mpe yandi lenda ve kusala disumu.” Wapi mutindu yandi lendaka sumuka na ntangu ya ke na dikabu ya disumu samu na yandi?

⁹⁰ Wapi mutindu mu lendaka vwanda ya kubela na yina mu kele na mavimpi ya mbote? Wapi mutindu mu lendaka vwanda mpofu na ntangu mu lenda mona? Oh, la la! Wapi mutindu mu lendaka vwanda na kati ya yinzo mpe na nganda ya yinzo na ntangu mosi? Wapi mutindu mu lendaka vwanda ya kulawuka malafu mpe mabanza ya mbote na ntangu mosi? Beno lenda sala yawu ve.

⁹¹ Mpe ntangu beno me vuluka, beno kele na nsi ya Lemvo ya masumu, mpe ba ke tangila beno diaka masumu ve. David tubaka ve ti, “Kiese na muntu yina Nzambi ke tangaka masumu ya yandi ve, mpe yina ba ke tangilaka disumu ve”? Nzambi ke

tangilaka kigangwa ya Yandi disumu ve. Yai keke ngolo. Ya keke miliki ve. Kasi ya ke Biblia. Nzambi ke tanga ve disumu na muntu ya mbote.

⁹² “Nzambi,” na nzila ya lemvo ya Yandi, na nzila ya nsodolo ya ntete, “zola ti muntu kufwa ve, kasi bantu nionso kubalula bantima.” Kasi na kuvwandaka ya seko, mpe yina zabaka nani ke kwisa mpe nani ke kwisa ve, Yandi kubikaka nionso kutambula na lukanu ya Yandi. Kana Yandi salaka yawu ve, samu na yinki Yandi pesaka muswa na disumu na kisika ya ntete? Ntangu Yandi vwandaka Mvulusi. . . Kana ata mbala mosi ve nsumuki vwandaka, Yandi zolaka vwanda ata mbala mosi ve Mvulusi; kinama, yina vwandaka na kati ya Yandi, zolaka talana ve.

⁹³ Wapi mutindu Yandi kumaka munganga? Wapi mutindu Yandi kumaka munganga? Samu ti Yandi pesaka muswa na kimbevo na kukwisa, samu Yandi kukitalisa Yandi mosi mutindu munganga. Yandi vwandaka munganga. Wapi mutindu beno lenda vwanda ntete. . . Wapi mutindu Yandi zolaka zabana? Wapi mutindu kinama ya Yandi zolaka kukota na kisalu? Wapi mutindu Yandi zolaka vwanda munganga, kana kimbevo mosi ve vwandaka? Ya lombaka ti Yandi kupesa muswa na kimbevo.

⁹⁴ Ya keke ya ngitukulu ve ti, Paul kutubaka, na ba-Romain 8, “O nge kilawu, nani lenda zonza na kiyidiki banzungu yinki ya fwana sala; nani, ntangu ntoto ke telama mpe ke tubaka, ‘Samu na yinki, nge, ke sala muntu mutindu yayi?’ Yandi telemisaka ve Pharaon samu na kikuma yina mosi, samu ti Yandi talisa nkembo ya Yandi na Egypte? Yandi ke kumisa ngolo yina Yandi zola, mpe ke nungisa yina Yandi zola. Ya keke ve yina muntu zola, to yina muntu ke sala, kasi ya keke Nzambi yina ke monaka mawa.”

⁹⁵ Na yawu, beno keke na kima ve ya kusala samu na yawu. Beno keke na kima mosi ve ya kusala. Kana ya keke lemvo, kana ya keke dikabu ya mpamba, ya keke na kima ve yina beno lenda sala samu na yawu. Nzambi pesaka yawu na beno, mpe yina keke luzolo ya Nzambi. Ya keke kima yina Nzambi solaka ntete samu na beno.

⁹⁶ Biblia me tuba ti beto vwandaka “ya kusola ntete bana ya babakala ya kundima, bana ya babakala ya Nzambi, ntete mbatukulu ya yinza.” Na yina, ntangu Nzambi kufwaka Mwana-dimeme, na kati ya dibanza ya Yandi Mosi, ntete mbatukulu ya yinza, samu na kulakisa binamina ya Yandi, yina Yandi vwandaka; ntangu Mwana-dimeme kufwaka, beto kufwaka na Yandi. Ntangu Yandi bakaka Menga ya Mwana-dimeme na kati ya dibanza ya Yandi, kuna ntete mbatukulu ya yinza, nkumbu ya muntu mpe ya beno kusunamaka na Buku kuna, nionso na kati ya dibanza ya Yandi ya nene.

⁹⁷ Yandi keke ya seko. Kana Yandi vwandaka yina ve, samu na yinki Yandi pesaka muswa na yawu? Yinki me lutila ngolo, (mu vwanda me tuba yawu,) Mvulusi to nsumuki? Nani keke na ngolo

ya kulutila? Na yawu, ya kulutila ngolo zolaka kupesa muswa na ya kukondwa ngolo, mpe Yandi ke salaka yawu kaka samu na nkembo ya Yandi. Ntangu Yandi salaka Lucifer, Yandi zabaka ti yandi zolaka vwanda diabulu. Ya lungaka ti Yandi kubika yawu kuvwanda kuna samu na kutalisa ti Yandi vwandaka Mvulusi, Klisto. Ya lombaka ti Yandi kubika yawu kusalama mutindu yina.

⁹⁸ Ntangu yayi, Biblia ke tuba ve, ti, “Mambu nionso ke salaka mbote na bayina ke zolaka Nzambi”? [Dibuundu me tuba, “Amen.”—Mu.] Na yawu beno ke na boma ya yinki?

Beto telama mpe beto kota na kosalu,
Na ntima ya kubelama na kunwana.
Beno vwanda ve mutindu bitwisi, yina ba
fwana benda mpe kubondila!
Kasi vwanda munungi-mvita!

⁹⁹ Mu zola yawu. Beno telama! Mukunga yina vwandaka sadisaka munu mingi ntangu mu vwandaka mwana ya fioti, ya vwandaka kima mosi ya mutindu yayi:

Ya vwandaka na mvwama mosi ya Rome,
Na bilumbu ya Kimfumu ya Rome;
Yina kuwaka ndinga ya ngoy-ngoy mosi,
Na ntwala ya yinzo ya nene ya mfumu ya
vwandaka tuba:
“Oh, lukengelo ya munu kele na yinti ya sabin
yayi,
Muntu ve lenda kwisa ningisa yawu.”
“Oh, ve,” tubaka munungi-mvita,
“Mu ke kuka to kusala yawu.”

¹⁰⁰ Beno yayi. Ya kieleka. Kana Biblia yayi ke longa ti Yesu Klisto kele mutindu mosi mazono, bubu yayi, mpe kukonda nsuka. . . Ya vwandaka ve kima ya mpasi ntangu mu basikaka na tabernacle yayi kilumbu yina, mpe bantu nionso vwandaka tuba na munu ti *yayi* ke salama, mpe *yina* ke salama. “Ba ke tala nge muntu ya fanatiki, ba ke losa nge na boloko, mpe kimvuka nionso ya minganga ke telemina nge.” Kasi Nzambi tubaka sala yawu. Biblia me tuba ti Yandi vwandaka. Mpe ntangu yayi tiya ya reveil ke na kupela na konso yinsi yina kele na nsi ya Mazulu. Samu na yinki? Beno telama na zulu ya yawu!

Yinki mutindu beno ke bandaka kosalu ya beno
konso kilumbu?
Beno ke vwandaka na boma ya kosalu yina
beno ke sala?
Ntima ya beno kele na kosalu?
Yintu ya beno kele ya kulemba mpe kele
mpamba? (Mu ke yinaka bima ya mutindu

yina.)
 To ntima ya beno kele na kisalu,
 To boma me fuluka na zulu ya yawu?
 Kana ya kele mutindu yina, baka yankaka yina
 nge ke mona,
 Na kubanzaka ti beno lenda kuka yawu.

¹⁰¹ Beno vwanda na yawu. Kieleka. Beno baka lukanu ya kieleka na kati ya ntima ya beno, mutindu Daniel. Beno vwanda na Nzambi.

¹⁰² “Wapi kisika nionso yayi kusalamaka? Wapi mutindu yawu kubandaka? Yinki ke sala bantu mutindu yayi? Samu na yinki beto me belama na kubeba? Mpangi Branham, bangula munu yawu. Yinki ke nata nge na kubanza ti kima nionso yayi ke zimbana?” Ya zimbanaka mbala mosi na ntwala, (ya kele kieleka?) na lufwa ya kifuluka ya masa. Ntangu yayi awa beto ke kota na bima ya mudindu. Mpe beto ke belama na kutanga.

¹⁰³ Awa mu zola ti beno kubaka na munu ntangu yayi, na Buku ya Genese, na kapu 3. Kana beno zola kuzaba kima, mu lenda kutalisa beno na kati ya Buku yayi ya Genese kisika konso kusambila mpe konso isme, mpe nionso yina kele na beto bubu yayi, kubanda na Genese. Bantu yikwa zaba ti *Genese* zola tuba “mbatukulu”? Ya kieleka.

¹⁰⁴ Beto ke tala dibuundu ya Catholique na mbatukulu, Babylone, Nimrod kiyidiki; beto ke tala yawu na kati-kati ya Biblia, beto ke tala yawu na nsuka ya Biblia; beto ke tala, kumeka kunata milongi ya bakento, na mbatukulu ya Biblia, na nzila ya kusambilaka mwa biteki yina ba me sala na bansimbulu. Bantu yikwa me tangaka disolo, ya *Ba-Babylone Zole*, ya Hislop? Mbote mingi. Beno kwenda tala yawu, na kati ya masolo. Ba vwandaka na kento. . . Mpe na manima, beno me bambuka moyo? Mpe Jacob kuyibaka banzambi ya batata ya yandi, mpe mwana ya yandi ya kento vwandilaka yawu na nsi mpe nataka yawu kuna na ntoto ya kuyuma, yina tulaka mvindu na camp, na ntwala. Mbote.

¹⁰⁵ Beto tanga awa ntangu yayi na Genese.

Nioka vwandaka mosi ya kulutula mayele na baniama nionso ya bilanga yina MFUMU Nzambi salaka. Mpe yandi tubaka na kento, Kieleka, Nzambi tubaka ti, Beno ke kudia ve na bayinti nionso ya disamba?

. . . kento tubaka na nioka, Beto lenda kudia mbuma ya bayinti ya disamba:

Kasi mbuma ya yinti ya . . . na kati-kati ya disamba, Nzambi tubaka, Beno lunga kudia yawu ve, beno fwana kusimba yawu ata fioti ve, na boma ti beno kufwa.

Mpe nioka tubaka na kento, ya kieleka Beno ke kufwa ve:

Samu ti Nzambi zaba ti kilumbu yina beno ke kudia yawu, na manima meso ya beno ke zibuka, (beno me mona, kusosa Nsemo ya malu-malu), mpe beno ke kuma mutindu banzambi, samu na kuzaba mbote mpe yimbi.

¹⁰⁶ Beno me mona mutindu bantu yayi kele bubu yayi, mutindu bawu ke na kumeka na kukatula na Biblia? “Beto tala, ya kele kaka mpasi ve na kutiamuna masa, to mwa kumwangisa ya masa, to mutindu yayi, to mutindu yina?” Ve, tata. Nzambi salaka manaka, mpe ya kele yina beto fwana landa, Yayi.

Mpe ntangu kento monaka ti yinti vwandaka mbote samu na kudia, mpe ti yawu vwandaka mbote na disu, mpe yinti samu na kusala . . . vwandaka mbote samu na kupesa ndwenga, yandi bakaka bambuma ya yawu, mpe kudiaka, mpe pesaka mpe na bakala ya yandi; mpe bakala kudiaka.

Mpe meso ya bawu ya mosi na mosi zibukaka, mpe bawu bakulaka . . . bawu vwandaka kinkonga; mpe bawu tungaka matiti ya yinti ya figi, mpe salaka bansinga ya luketo samu na bawu.

¹⁰⁷ Mu zola kutelama awa minuti fioti. Ntangu yayi, kima nionso fwana vwanda na mbatukulu. Beno kuzwaka mbatukulu. Ntangu yayi beto . . . Ya kele awa kisika mu zola kuvwandisa nionso, ntangu yayi, ya yina beto zonzilaka kubanda na balukutakanu zole yayi yina vwandaka me luta, tii awa.

¹⁰⁸ Ntangu yayi, na suka yayi beto me vutuka na manima mpe beto me monikisa yawu na kifikulu, na kati ya Biblia, ti ntangu Nzambi vwandaka sala ntoto, ti ntangu Yandi vwandaka sala mipepe; mpe na manima mipepe yango kumaka calcium, mpe potasse, mpe—mpe bima ya mutindu yankaka. Yandi vwandaka sala nzutu ya beno. Yandi vwandaka kubika yinzo ya nene, mutindu mfumungu ya nene, mutindu mfumu-kisalu yina ke na dikani me kubika bima ya yandi ya kutunga yinzo. Yandi vwandaka sala nzutu ya beno, mpe Yandi tulaka yawu kuna. Kieleka Yandi zabaka mbote-mbote, na kati ya dibanza ya Yandi, yinki zolaka salama.

¹⁰⁹ Diboko yayi, Nzambi salaka diboko yayi ntete Yandi . . . na yina Yandi vwandaka sala yinza; kasi, mpeve ya munu Yandi salaka yawu ntete yinza vwanda. Ntangu yayi, kasi diboko yayi mpe nzutu yayi, Yandi salaka yawu ntangu Yandi salaka yinza, samu ti nzutu yayi katukaka na ntoto, mpe ke vutuka na ntoto. Nzambi salaka yawu. Yandi kubikaka nionso yayi na kati ya dikani ya Yandi ya nene mpe na kati ya manaka ya Yandi.

¹¹⁰ Kuna, ntangu Yandi kotaka na kusala ntoto, Yandi salaka bakala, mpe bakala vwandaka talana mbote ve. Awa beto vwandaka me tala yawu, na suka yayi, kulakisa yawu na kifikulu, mutindu Tata kulumukaka mpe kwisa tala mwana ya

Yandi ya bakala, ya kusala na kifwani ya Yandi, mpe nionso yina. Na manima Yandi sadilaka yandi kento, nsadisi.

¹¹¹ Ntangu yayi, beno bambuka moyo, ti, bivangu nionso ya ntoto, Adam pesaka bawu bankumbu.

¹¹² Yandi salaka bitwisi, mpe baniamu, mpe bima nionso. Mpe bubu yayi, beto. . . Bantu ya mayele ya bantangu mpe—mpe ya mabanza ya nene ya mutindu yankaka ya luzabu, ke na kumeka, funda sambanu ya bamvula, samu na kuzaba kitini yina ke na kukondwa, samu na yinki niama yango. . . Muntu kele niama ya moyo. Beto zaba yawu, ti beto kele ya kusala. . .

¹¹³ Mpe kento kele kaka kitini ya bakala, kivangu na nzila ya. Kento vwandaka ve na ngidikulu ya ntete. Nzambi sukaka na kuyidika, bamvula mpe bamvula mpe bamvula, ntangu Yandi salaka kento na nzila ya lupanzi yina ba bakaka na ndambu ya yandi. Adam vwandaka me pesa bankumbu na ngidikulu nionso, na bima nionso yankaka, kasi yandi vwandaka ata kima mosi ve samu na yandi mosi. Na yawu, Yandi sadilaka yandi nsadisi; Yandi bakaka lupanzi na lweka ya yandi, kangaka mputa, mpe salaka nsadisi samu na yandi. Mpe bakala, na kati ya mpeve ya yandi, vwandaka nionso zole bakala mpe kento.

¹¹⁴ Mpe kento ke kaka kitini ya bakala. Mpe ntangu bakala ke bakaka kento samu na yandi, mpe kana kento kele kieleka kento ya yandi, kento yina Nzambi pesaka, yandi ke vwanda kaka samu na yandi mutindu kitini ya yandi.

¹¹⁵ Ya kele samu na yina beno ke na bampasi mingi na kati ya makwela, ya kele samu ti beno ke basika mpe ke mona mwana-kento mosi na meso ya ndombi ya kitoko to ya meso ya blue ya kitoko, to kima ya mutindu yina, mpe ya nzutu ya mbote, mpe beno ke zola yandi mbangu. Mbala ya ntete yandi ke buta mwa mwana ya yandi ya ntete, ti meno kukatuka yandi, mpe ti yandi vwanda na mifutu mpe kukuma kiboba, mpe kuna beno zola kulosa yandi na nganda. Mpe ndambu ya beno bakento ke tala mwana ya bakala mosi na bansuki ya yandi ya kubwa ya mulengu, na ndambu ya bwate ya saindoux ya mama ya yandi ya kutula na zulu ya yintu, mpe ya kubaluka. Mpe nionso ke kubwa; mu zaba yawu na manima ya kimbangi. Kasi yinki ke salamaka? Yinki ya kele? Beno me zola yandi mbangu.

¹¹⁶ Beno fwana kusambila, ntete, samu ti kento kele kitini ya beno. Mpe kana beno me pusa kento na ntulu ya beno, mpe ti beno me baka yandi mutindu kento ya beno, mpe beno. . . Kento ke bika kitambi na zulu ya beno. Beto ke tuba yawu mutindu yina samu ti beno kuvisa. Mpe konso kento yankaka pene-pene ya ntulu yina ke simba ve na kitambi yina. Mpe Nzambi ke tula yawu na zulu ya beno. Mpe beno bambuka moyo na yawu.

¹¹⁷ Beno yina ke basikaka na kento ya muntu yankaka mpe. . . Mu vwandaka me kuwa bubu yayi disolo ya mwa mwana mosi ya kento ya mbanza, nsukami ya mwana-kento. Mu zaba yandi.

Mpe kibudi mosi vwandaka sumbila yandi bilele mingi ya kitoko, mpe bima, mpe vwandaka meka na kuzwa yandi mutindu yina. Mpuku, muntu yina lendaka sala kima ya mutindu yina, ba lenda tala yandi ve mutindu muntu.

¹¹⁸ Beno zaba, yimbwa kele ya kubwa mutindu yina ve, mpe kasi beno ke bokilaka yimbwa ya mama “dilala.” Yandi me lutila nkadulu ya buzitu na ndambu ya bakento ya Jeffersonville. Mpe beno ke bokilaka ngulu ya mbote ya mama “ngulu ya kento,” mpe yandi kele ve. . . Yandi me lutila nkadulu ya buzitu na bakento ya Etats-Unis yayi, mingi na kati ya bawu. Ya kieleka ya kele ya kulunga. Awa, mu zaba ti ya kele ya kubaluka ve. Mpe mu tubaka na beno ti mu ke zonzila yawu na ngolo nionso, mpe mu zola ti beno kuzaba yawu. Mpe ya kele kieleka. Bawu nionso, bakento ya bilumbu yayi, zaba ve yinki kele nkadulu ya luzitu. Bawu ke tuba, “Ya ke sala munu mpasi ve.” Mbote, beno ke na yawu ve. Beno tala. Yinga, tata. Na yina, beno zaba yina kele mbote mpe yimbi.

¹¹⁹ Ntangu yayi beno tala. Muntu yayi, ntangu ba salaka yandi, Nzambi kabulaka mpeve ya yandi. Mpe Yandi bakaka kitini ya bakala, ndambu ya yandi, mpe salaka kento na yawu. Mpe na manima Yandi bakaka bukento, mpeve ya bakala ya kukondwa ngolo, mpe salaka kento na yawu. Mpe Yandi salaka bakala bakala, ya ngolo.

¹²⁰ Mpe ntangu beno ke mona bakala yina kele mwa. . . beno zaba, yina ke yidikaka misapi, to nionso yina beno ke bokilaka yawu, misapi ya yandi; mpe, beno zaba, yiya lweka yayi mpe tanu lweka yankaka, mpe—mpe ke yidika bansuki; ke fungula yinwa mutindu yayi, mpe bima ya mutindu yina; mosi ya bantwenya ya babakala ya kitoko yayi. Beno bambuka mbote moyo, mpangikento, ti ya kele na kima mosi ya yimbi na ndeke yayi. Ya kele na kima ya yimbi. Ya ke vwanda mbote ti beno kukaya disu na yandi.

¹²¹ Mpe ntangu beno ke mona kento na fumu na lweka ya yinwa, na ya kulwata salopette, mpe yina ke tuba, “Bakala, mu ke zonza na nge, yinki ya kele!” Mpangi-bakala, beno tala mbote ntwenya ya kento yina. Kima ya yimbi kele na yandi.

¹²² Kento, fwana vwanda kento, mpe yandi fwana kulwata mutindu kento. Ntangu Nzambi salaka bakala, Yandi salaka yandi na mutindu mosi, mpe Yandi salaka kento mutindu yankaka. Mpe ntangu Nzambi lwatisaka bakala, Yandi lwatisaka yandi mutindu mosi, mpe kento mutindu yankaka. Mpe Biblia ke tuba, “Ya kele ya kulutila yimbi na kento na kulwata kilele yina kele ya bakala.”

¹²³ Mpe beno bakento, yina ke lwataka ba-pantalon mpe bima yina, mpe kulwata yawu awa na nganda, mwa. . . Wapi mutindu beno ke bokilaka yawu, ba-knickerboker? Wapi mutinu bawu ke. . .? Oh, yinki ya kele kima yina bawu. . .? Ve, ve, ya kele

bakupe ve, ya kele kima yankaka, yina ke na makulu ya yinda. [Dibuundu me tuba, “Ba-pantalon ya kukangama na nzutu.”—Mu.] Ba-pantalon ya kukangama na nzutu, mpe ba-salopette, bilele ya kisalu.

Beno kota kuna, ba ke tuba, “Yayi kele samu na bamfumu ya kento.”

¹²⁴ Mu tubaka, “Ve, beno kele na kyeta. Bamfumu ya kento ke lwataka ve bima yayi. Bakento lendaka lwata, kasi bamfumu ya kento ve.” Ya kele kieleka.

¹²⁵ Biblia ke tuba, “Ya kele ya kulutila yimbi na kento na kulwata kilele. . . mpe samu na bakala na kulwata kilele yina kele ya kento.”

¹²⁶ Mpe konso kilumbu, babakala ke na kulutilaka na kukuma mutindu bakento, mpe bakento ke na kulutilaka na kukuma babakala. Diambu kele yinki? Beto ke tala yawu na mwa minuti, na nzila ya Biblia. Bakento kele diaka ve bakento. Mu zola kuzonza ve beno bakento ya Miklisto. Mu ke na kuzonzaka landila ndyantulu ya ntangu yayi. Bawu zola kusala mutindu babakala; bawu zola kuzenga bansuki mutindu babakala; kutula diboko na zulu ya mesa ya banganda, mutindu *yayi*, mpe kuyimba *Nzambi Kusakumuna Amerika*, na fumu na lweka ya yinwa.

¹²⁷ Bawu ke kwenda na bala-bala, na kukwendaka na manima mutindu yayi, kuna na nzila ya nene ya mbangu. Beto tangaka. . . Mu zola kuzonza na beno diambu mosi. Mpe beno bakento yina ke nataka matoma, beno kuwa. Billy Paul na munu, na lukutakanu ya nsuka yayi yina beto tambulaka yinsi, bangonda sambanu, mu tangaka bafoti nionso ya kunata matoma na nzila. Mpe na zulu ya nkama tatu ya mambu yina ke salamaka, na nzila, beno lenda banza yikwa vwandaka bankento yina ke nataka matoma? Ya vwandaka kondwa kaka. . . Kumi na yivwa ya bawu vwandaka babakala. Mpe nkama zole na makumi nana to, mu banza ti ya vwandaka, nkama zole na makumi nana na mosi kuna zolaka vwanza bakento yina ke nataka matoma. Bakento yina ke nataka matoma! Awa, mu ke na kutubaka ve ti ya kele na bakento yina ke nataka matoma mbote ve. Kasi lweka nionso yandi ke baluka.

¹²⁸ Mpe beno meka na kudasukila yandi? Ti yandi vwanza kitoko, kuvwanda kuna, ke na kusana bansuki ntangu pulusu ke kwisa. “Kasi,” yandi ke tuba, “ya kieleka, beno kele yina me sala foti!” Hmm! Beto kele na musiku ve.

¹²⁹ Bawu lakisaka yawu kilumbu yankaka yina na lufundusu ya diambu ya mpaku yina mu vwanza me lutila. Beto ke na misiku ve. Kana ya kele. . .

¹³⁰ Ntembe kele ve ti bamfumu ya nene yayi ya Angleterre tubaka, “Democratie nionso vwanza bavwela kasi ya kukondwa kizundu.” Ya kele kieleka, bawu ke telama na zulu

ya sanduku ya sabuni, na mwangusulu ya luvoti. Democratie me beba, mpe mutindu mosi ba-dictateur mpe nionso yankaka ya yawu. Nionso me beba. Samu na Nzambi ya me bikana kima mosi ya kusala, ya kele kumwangisa nionso, mutindu Yandi tubaka ti Yandi ke sala, mpe kubanda ya malu-malu. Ntangu yayi beno tala mbote mutindu beno me belama na Kwizulu.

¹³¹ Ntangu yayi ntangu kento yayi...Yandi salaka yandi nsadisi, mpe kento yango zolaka vwanda nsadisi. Mpe kuna . . .

¹³² Ntangu yayi, awa, ata mbala mosi ve mu me kuzwaka mulongi yina kele ntima mosi na munu na yayi. Mpe bawu ke mekaka na kulakisa yawu mutindu yankaka, kasi samu na munu ya kele na nzila ya mbote ve. Bawu ke mekaka na kutuba ti Adam na Eve kudiaka ba-pomme. Mpangi-bakala, kana . . . Ntangu yayi mu ke tuba yayi samu na kusakana ve, kasi mu zola kutuba yayi. Na kutala, kana kudia ba-pomme ke nata bakento na kuzaba ti bawu ke na bilele ve, ya ke vwanda mbote ti beto lutisa diaka ba-pomme. Mpe beno zaba ti ya kele kieleka.

¹³³ Beno zaba, kudia pomme, ya kele ve yina bawu salaka, yina ve salaka ti bawu kuzaba ti bawu vwandaka na bilele ve. Ya kieleka, ya vwandaka yina ve. Ya fwana katuka na kuvukisa ya nzutu ya bakala na kento. Ya fwana vwanda yina, samu ti bawu bakulaka ti bawu vwandaka na bilele ve ntangu bawu bakaka mbuma ya kupekisa. Kento kele ve yinti ya bambuma? Beno kele ve mbuma ya mama ya beno? Yina vwandaka mbuma yina vwandaka ya kupekisa.

¹³⁴ Ntangu yayi awa ya kele na kima ya nene. Ntangu yayi pene-pene ya yina luzabu ya muntu me tala ntete na kuzaba yina muntu vwandaka . . .Bawu ke timuna mikwa ya ntama, bawu ke baka bitini yina bikanaka, mpe bawu ke baka bayintu, mpe bawu ke baka bayintu ya mafwa, mpe maboko, mpe mikwa, mpe ke meka na kukumisa yawu muntu. Mpe bawu zaba ti kima ya pene-pene yina bawu me kuzwa ntete, yina me belama na muntu, kele kimpenzi. Yawu kele kima yina kele ya kubelama na muntu; kasi diaka ya kele na kima mosi ve ya mutindu na muntu, yina kele ya kulutila.

¹³⁵ Mutindu ya luzingu yina kele na nsi mingi kele mpangu; mutindu yina kele na zulu mingi kele muntu. Nzambi bandaka na nsi mpe me landa na kumata, tii Yandi me kuma na zulu na kifwanisi ya Yandi. Yandi me luta na bandeke mpe bibulu, mpe me mata, tii Yandi me kuzwa kifwanisi ya Nzambi. Yandi salaka muntu na kifwanisi yina. Yina kele mutindu ya zulu mingi. Mutindu yina kele na nsi mingi kele ditaka yina kitukaka mpangu, mpe nionso yankaka yina.

¹³⁶ Ntangu yayi, kitini yayi yina ke na kukondwaka, yina bawu ke na kulendaka ve na kuzwa. Beno tala mbote Masonukwa ntangu yayi. Beno, beno ke ndima yayi ve, mingi ya beno, kasi

mu zola . . . mu zola ti beno kuyindula yawu. Mpe ti beno kubaka lweka mosi kaka ve ya yawu. Beno kuwa.

¹³⁷ Mu zaba ti mingi ya beno kuwaka Mulongisi DeHaan. Ya kieleka mu . . . Mutindu ya muntu ya mutindu yandi, mpe mpangi-bakala ya mbote ya Baptiste, mpe ya kieleka ti mu zola yandi. Yandi kele na mayele mingi mpe kele na yintu ya mayele, mpe—mpe yandi me zimbana mingi na yina mu lendaka zaba; samu ti yandi kele Mulongisi ya Luzabu ya—ya bunzambi, mpe yandi kele dokotolo ya budokotolo, mpe yandi kele Dokotolo ya Luzabu ya yinza na kimuntu. Yandi kele muntu ya mayele mingi. Kasi yandi ke tuba ti bayayi . . . Ntangu bana ya babakala ya Nzambi kumonaka bana ya bakento ya bantu kitoko; yandi ke baka lweka ya Josephe, mpe ke tuba ti “bawu—bawu kotaka na banzutu ya bantu,” mpe bawu bakaka na kati ya bawu bakento. Mpe ya vwandaka na bakafumba ya bantu na ntoto ya Nod. “Mpe bawu bakaka bawu mosi bakento mpe bawu zingaka na bawu, ntangu bana ya babakala ya Nzambi, Bawanzio yina kubwaka, bakaka mpe monaka bana ya bakento ya bantu; mpe nsatu ya kuvukisa banzutu vwandaka kima mosi ya ngolo mingi, mpe samu bawu sumukaka bawu kubwaka, bawu kotaka na banzutu ya bantu.”

¹³⁸ Kana bawu sala yawu, bawu ke bebisa kubeluka ya Kimpeve, bawu ke bebisa nionso yankaka. Kana diabulu lenda kuyidika, yandi ke vwanda mutindu mosi na Nzambi. Diabulu lenda ve kuyidika. Mu zola ti beno kulakisa munu kisika mosi yina diabulu lenda kuyidika. Yandi lenda ve kuyidika. Yandi ke bebisaka kaka yina ba me yidika. Yandi kele muyidiki ve. Yandi kele kaka mubebisi.

¹³⁹ Mbote, na yina, yinki salamaka? Beno tala mbote. Beno tala mutindu ya munu ya kutala. Beno tala kitini yina ke na kukondwa.

¹⁴⁰ Ntangu yayi bawu ke baka kimpenzi, kasi beno lenda ve kuvukisa kimpenzi na kento mpe kuzwa mwana. Beno lenda ve kuvukisa muntu na niama mosi. Ya lenda kuvukana ve. Beno lenda ve kupesa menga, na niama mosi.

¹⁴¹ Ntangu mu vwandaka na Afrika, bawu vwandaka sala bamputu ya bantu ya ndombi yayi kuna na mutindu mosi; muntu mosi tubaka na munu, yandi tubaka, “Bawu kele kima ve kasi bibulu.”

¹⁴² Mu tubaka, “Mulemvo ya nge. Bawu kele bantu mutindu kaka nge, mu banza ya kulutila diaka fioti.” Bika mu zonzila beno, ntangu beno ke kuzwa mutindu ya nkadulu yina, beno ke na kukuma mutindu niama. Mu tubaka, “Muntu yango, kana yandi vwanda ndombi mutindu as de pique, to kana yandi vwanda na tinta ya mwamba mutindu nteete, to kana yandi vwanda blue mutindu mbuma ya indigo, yandi lenda vuukisa luzungu ya nge na kupesaka nge menga. Kasi kutula menga ya

niama na kati ya nge ata mbala mosi ve.” Ya kieleka, yandi kele muntu.

¹⁴³ Samu kaka ti mpusu mosi kele ndombi, mpe yankaka yina ndombe, mpe yankaka diaka mosi ya ntinta ya mwamba, mpe yankaka mpembe, yina ke sala kima mosi ve na yawu. Biblia ke tuba, “Nzambi na menga mosi salaka bantu nionso.” Mpe ya kieleka ya kele ya kulunga. Bisika beto me zinga, me sobisa bantinta ya beto, yina ke sala kima mosi ve na yawu. Nzambi salaka na muntu mosi—mosi bayinsi nionso, na menga mosi, bayinsi nionso mutindu mosi.

¹⁴⁴ Bantu ya Chine; mundombi lendaka tuba ntangu yayi ve, muntu ya ndombi lendaka tuba ntangu yayi ve, ti, “Muntu ya Chine yayi, yandi—yandi ke na ntinta ya mwamba, mu ke na kima ve ya kusala na yandi.” Yandi kele mpangi ya beno ya bakala. Mpe nge mundele lenda ve kutuba na muntu ya tinta ya mwamba to na mundombi, mosi to yankaka, “Mu ke na kima mosi ve ya kusala na nge.” Yandi kele mpangi ya beno ya bakala. Ya kieleka ya kulunga.

¹⁴⁵ Beno tala, ntangu yayi, beno tala yina salamaka. Mu ke kwikilaka, mpe mu lenda kulakisa yawu na nzila ya Biblia, ti ya kele nioka yina salaka yawu. Nioka kele muntu yina ke na kukondwaka na kati-kati ya kimpenzi na muntu. Samu ti, beno kuwa, beno tala yayi ntangu yayi, ti nioka vwandaka ve nioka yina ke tambulaka na kivumu. Yandi vwandaka ya “mayele ya yimbi” kulutila bibulu nionso ya bilanga.

¹⁴⁶ Ntangu yayi, mu vwanda me kwenda sosa na mabuku ya bampova, bubu yayi, bisika nionso, samu na kutala mpova yayi, yina mpova ya *mayele ya yimbi* zola tuba. Ya zola tuba “kuvwanda na mayele mingi, kuvwanda na mayele mutindu dikaku,” mpe, ntendulu ya mbote na—na Kihebreu (ya m-a-h-a-h, mahah) zola tuba “kuvwanda na luzabu ya misiku ya luzingu.”

¹⁴⁷ Ntangu yayi beto tala yawu mbote minuti fioti. Yandi ke na mayele mingi, ke na mayele mutindu dikaku, kasi nkumbu ya yandi kele “nioka.” Kasi, beno bambuka moyo ti, yandi vwandaka kima yina vwandaka ya kulutila mayele, mpe yina vwandaka kieleka mutindu muntu na bima nionso yankaka yina vwandaka na bilanga; ya kubelama mingi na muntu. Yandi vwandaka ve nioka. Ya kele ndoko yina kumisaka yandi nioka. Mpe yandi vwandaka . . . Biblia ke tuba ti yandi vwandaka ya kulutila kitoko na nionso.

¹⁴⁸ Mpe ndoko katulaka ve kitoko ya yandi nionso; na nionso ntinta ya kulutila kitoko ya nioka kele kitoko mingi, mpe bweso mpe mayele ya yandi. Mpe ndoko lendaka ve na kukatula yawu. Kasi, beno bambuka moyo ti, Nzambi tubaka na yandi ti yandi ke wombisa makulu ya yandi mpe ti yandi ke tambula na kivumu ya yandi. Mpe beno lenda ve kutala mukwa mosi na nioka yina

kele mutindu muntu, mpe ya kele samu na yina luzabu ya yinza na kimuntu ke na kuzabaka ve. Kasi yandi yayi.

149 Nzambi bumbaka yawu na meso ya bantu ya ndwenga mpe ya mayele, mpe silaka kumonikisa yawu na bana ya babakala ya Nzambi, na bilumbu ya nsuka ntangu bana ya babakala ya Nzambi ke talana, ntangu, “bana ya babakala ya Nzambi vwandaka sala miloolo na ntuala ya mbatukulu ya yinza.” Ntangu luzayikisu ya nene ya Bunzambi mpe nionso ke pesama na bilumbu ya nsuka, Yandi ke monikisa nionso yayi na nzila ya bana ya babakala ya Nzambi. Beno zaba ti Masonuku ke longisa yawu. Mpe beto bawu yayi. Ya kele samu na yina Nzambi ke na kufungulaka bima yayi na beto. Nzambi ke na kunataka bana ya Yandi ya babakala na kuzabana. Yandi ke na kukwenda kuluta bandilu ya luzabu ya konso muntu, na nzila ya baluzayikisu ya kimpeve, mpe samu na kupesa beto Yawu. Beto vwandaka me longisa ve, na kati ya Biblia yayi, “Yandi yina ke na ndwenga”? Yina yandi me longoka na seminere ve; kasi yina yandi me longoka na kufukamaka na ntuala ya Nzambi, mpe yina Nzambi me zola na kupesa yandi. Bana ya babakala ya Nzambi, yina me zabana!

150 Beno tala nioka, ntangu yayi awa kele yina nioka vwandaka; mu ke pesa beno dibanza ya munu ya yandi.

151 Beto ke. . .beto me katuka, na kiula, na ditaka-taka, mpe beto me landila mpe me landila, mpe *nionso yina*, tii na suka beto me kuma na dikaku, na kimpenzi. Mpe katuka kimpenzi, ntangu yayi beto me dumuka na kimpenzi na muntu, mpe beto ke na kumiyufula samu na yinki.

152 “Mbote,” luzabu ya yinza na kimuntu ke tuba, “awa beno vingila! Beto lenda vukisa kento na dikaku mpe na kimpenzi, mpe mutindu yankaka mpe, kuvukisa muntu na kimpenzi.” Ya lenda simba ve. Beno vukisa yawu na niama nionso yankaka; ya lenda simba ve. Menga ke vukana ve; beno baka menga ya beno, ya kele menga ya kuswaswana na nionso, na nionso.

153 Awa ya kele na menga na kati-kati, mpe bawu lenda ve kubakula niama. Oh, Aleluya, mu ke na kumitala mukwikidi malu-malu yayi. Beno tala. Samu na yinki? Nzambi lakisaka bawu yawu ve. Ya kele na ata mukwa ve na kati ya nioka yina kele mutindu mukwa ya muntu. Yandi tulaka kima yango ntama ti ya lendaka zabana ve na bantu ya mayele mingi.

154 Mpe mu ke lakisa beno wapi kisika muntu yayi ya mayele mingi katukaka, wapi kisika—wapi kisika yandi kele, na mutindu nionso. Beno me mona, yandi lenda kwisa ve na nzila yayi.

155 Ya fwana kwisa na nzila ya luzayikisu, “Nge kele Klisto, Mwana ya bakala ya. . .” “Na zulu ya ditadi yayi Mu ke tunga Dibuundu ya Munu; mpe bankotolo ya difelo ke lenda ve na kumwangisa yawu,” luzayikisu ya kimpeve. Wapi mutindu—

wapi mutindu Abel zabaka na kupesa munkayulu ya mwana-dimeme, na kisika ya Cain yina pesaka munkayulu ya bambuma ya bilanga? Ya vwandaka luzayikisu ya kimpeve na yandi. Beno ke kuzwa yawu na baseminere ve. Beno ke kuzwa yawu ve na nzila ya ba-denomination. Beno ke kuzwa yawu na Mazulu.

¹⁵⁶ Beno tala mbote nioka yayi, nioka yayi yina vwandaka ya ntete. Beto ke basisa kizizi ya yandi ntangu yayi. Yandi kele muntu mosi ya nene mingi. Yandi kele na kati-kati ya kimpenzi na muntu. Mpe, nioka; diabulu, Lucifer, zabaka ti yina vwandaka menga kaka yina lendaka vukana na menga ya muntu, muntu kaka yina yandi lendaka kusadila. Yandi zolaka lenda ve kusadila na kimpenzi, menga yina zolaka vukana ve. Yandi zolaka lenda ve kusadila na bima yankaka. Yandi zolaka lenda ve kusadila na dimeme. Yandi zolaka lenda ve kusadila na kavalu. Yandi zolaka lenda ve kusadila na niama nionso; ya lungaka ti yandi kusadila na nioka yayi.

¹⁵⁷ Beto baka yandi ntangu yayi mpe beto mona yina yandi kele. Yandi kele muntu ya nene mingi, kafumba ya muntu ya masolo ya ntama ya muntu. Ya kele kisika yina bawu kuzwaka mikwa ya nene yayi, mpe mu ke lakisa beno yawu na kati ya Biblia. Ntangu yayi beno tala mbote-mbote. Mbote. Muntu ya nene mingi yayi, beto sala mutindu ti yandi—yandi vwandaka yinda bametele tatu, na mapeka ya nene mingi; yandi vwandaka mutindu kaka bakala. Mpe menga ya yandi, na manima, ya kuvukisa niama mosi na yankaka beto me suka; beno lenda vukisa bibulu; mpe ya ke landila na kukuma menga ya kulutula, mutindu ya luzingu ya kulutula, nzutu ya kulutula, tii beto ke kuma na zulu na kisika ya muntu. Kasi kitini ya nsuka awa, na kati-kati awa, vwandaka me zengana. Bantu yikwa zaba ti luzabu ya yinza na kimuntu lenda ve kutala kitini yayi yina ke kondwa? Beno nionso zaba yawu. Samu na yinki? Beno tala yandi, nioka. Awa yandi vwandaka, muntu ya nene mingi.

Mpe diabulu me kulumuka, ntangu yayi, yandi me tuba, “Mu lenda pesa dibanza.”

¹⁵⁸ Ntangu yayi, ntangu beno ke talaka bakento mpe mutindu ya kusala ya bakento, beno bambuka moyo, beno kele ya kukusa na diabulu (mpe ti ya kele kento ya nge ve).

¹⁵⁹ Beno tala, awa, diabulu me kulumuka mpe me kota na nioka. Mpe yandi me tala Eve na kati ya nsaba ya Eden, ya kukondwa bilele, mpe yandi me zonzila na yina me tala mbuma yina vwandaka na kikuminu. *Kikuminu* zola tuba “yina kele na kati-kati,” mpe nionso yankaka yina; beno me bakisa yawu, beto kele kimvuka ya kuvukana. Mpe yandi me tuba, “Ntangu yayi, ya kele ya sukadi. Ya kele kitoko na meso.” Yinki yandi salaka? Yandi bandaka na kuvukisa nzutu na Eve, mpe yandi zingaka na yandi, mutindu bakala.

160 Mpe yandi talaka ti ya vwandaka ya sukadi, na yawu yandi kwendaka mpe tubaka na bakala ya yandi, kasi yandi vwandaka yimeni na kivumu, ya Satana.

161 Mpe kuna yandi butaka mwana ya yandi ya ntete ya bakala, yina nkumbu vwandaka Cain, mwana ya bakala ya Satana.

“Ntangu yayi,” beno ke tuba, “ya kele luvunu.”

162 Mbote, beto ke tala kana ya kele luvunu to ve. “Mpe Munu ke tula kuyina na kati-kati ya Nkuna ya nge na nkuna ya nioka.” Yinki? Nkuna ya nioka! Kento vwandaka na Nkuna, mpe yandi vwandaka na nkuna. “Mpe Yandi ke bebisa yintu ya nge, mpe nge ke bebisa kinkoso ya Yandi.” Mpe *kubebisa*, kuna, ya zola kutuba “kukatula Masumu.” Ntangu yayi beno tala “nkuna” ya beno ya nioka.

Ntangu yayi, beno tala, awa ke na kwisa babakala zole yayi.

163 Ntangu yayi, nioka yayi, ntangu yandi telamaka kuna, mutindu ya kafumba ya muntu ya nene yayi yina telamaka kuna, yandi sumukaka na kusalaka pité na kento ya Adam. Wapi kisika kele disumu bubu yayi? Yinki ke sala bima kuvwanda mutindu ya kele bubu yayi? Ntangu yayi, mu—mu. . . Ya kieleka ti beno lenda kubakula yina mu ke na kuzonzilaka. Mpe beno tala yina salamaka.

Mpe ntangu yandi salaka yawu, Nzambi me tuba, Yandi me banda na kubokila Eve na Adam.

Mpe yandi me tuba, “Mu kele ya kulwata bilele ve.”

Mpe Yandi me tuba, “Nani me zabisa nge ti nge kele ya kulwata bilele ve?”

164 Kuna bawu me banda na kusala, mutindu basoda, na kupesaka foti na yina kele na nsi. Yandi me tuba, “Mbote, ya kele kento yina Nge pesaka munu, yina me sala yawu. Yandi kele yandi yina me kwikisa munu.”

165 Mpe kento me tuba, “Nioka pesaka munu pomme”? Mbote, mulongi, vutukila mabanza ya nge.

166 Kento me tuba, “Nioka me vuna munu.” Beno zaba yinki *kuvuna* zola kutuba? Ya zola kutuba “kusafula.” Ya vwandaka mutindu yina. Ata mbala mosi ve ti diabulu pesaka yandi pomme. “Nioka me vuna munu.”

Mpe na manima me landila ndoko.

167 Yandi tubaka, “Samu nge me kuwa nioka na kisika ya bakala ya nge, nge me katula Luzingu na yinza. Mpe nge ke—nge ke bwela bampasi ya nge; mpe kubuta ya nge ke katuka na bakala ya nge,” mpe nionso yankaka yina.

168 “Mpe samu ti nge me kuwa kento ya nge, na kisika ya Munu (Mu me basisa nge na fundu-fundu; mutindu ya kulutula), nge ke vutuka na fundu-fundu.”

¹⁶⁹ “Mpe, nioka, samu ti nge me sala yina, makulu me katukila nge. Nge ke tambula na zulu ya kivumu ya nge, bilumbu nionso ya luzingu ya nge. Mpe ba ke yina nge. Mpe fundu-fundu ke vwanda madia ya nge.” Beno bawu yayi. Beno tala kitini yina vwandaka kondwa.

¹⁷⁰ Ntangu yayi awa ke kwisa Cain. Beto tala mbote bankadulu. Awa ke kwisa Cain. Nani yandi kele? Yandi kele muntu ya mumbongo ya yimbi. Yandi ke salaka bilanga. Ya mayele mingi, ya mayele; mukwikidi, mukwikidi ya kieleka; beno tala mbote ba ya yandi—beno tala mbote binama ya yandi ntangu yayi. Beno kwenda na ntuala na munu mwa minuti diaka.

¹⁷¹ Awa yandi me kwisa. Yandi zaba ti yandi kele ya nkadulu ya mbote. Yandi me zola kukwenda na dibuundu. Yandi me tungila yandi dibuundu, me kubika yandi munkayulu. Yandi me sala diziku, mpe nionso. Yandi me sala diziku, yandi me tula na zulu ya yawu bafololo. Yandi me tula bilanga. . . bambuma ya bilanga, yandi me pesa yawu na Nzambi. Yandi me tuba, “Ya Nge yawu yayi, Mfumu. Mu zaba ti beto kudiaka ba-pomme, ya kele yina nataka yawu.” Mosi ya bifumba ya yandi ke na mutindu mosi ya dibanza. Ya ke lakisaka kisika yina yawu katukaka. Yandi me nata ba-pomme ya yandi, na nganda ya bilanga, yandi me tula yawu kuna, yandi me tuba, “Yayi ke katula masumu.”

Nzambi tubaka ti, “Ya vwandaka ve ba-pomme.”

¹⁷² Kasi, na nzila ya luzayikisu ya kimpeve, Abel zabaka ti ya vwandaka menga. Na yawu yandi nataka mwana-dimeme, yandi me zenga laka ya yandi na soka, mpe yawu me kufwa.

¹⁷³ Mpe Nzambi me tuba, “Ya kele kieleka. Ya kele samu na yawu. Ya vwandaka menga.” Beno zaba wapi menga yina mu ke na kuzonzilaka. Mbote. “Ya kele menga yina salaka yawu.”

¹⁷⁴ Ntangu yayi beno tala mbote. Mpe ntangu Cain monaka mpangi ya yandi ya exalté kundimama na ntuala ya Nzambi, mpe ti bidimbu mpe mambu ya ngitukulu vwandaka salama kuna, yandi kumaka na kimpala na yandi. Yandi tubaka, “Beto ke sukisa kima yayi malu-malu yayi.” Beno tala bampangi ya yandi, beno tala bana ya yandi, bubu yayi. “Ntangu yayi, mu lutila mayele na yandi,” na yawu yandi kuzwaka nkele. Wapi kisika *nkele* katukaka? Beno lenda tuba ti nkele. . . ? Yandi kufwaka mpangi ya yandi ya bakala. Yandi vwandaka muntu yina ke kufwaka bantu.

¹⁷⁵ Beno lenda kubokila Nzambi muntu yina ke kufwaka bantu? Mpe Adam vwandaka mwana ya bakala ya Nzambi. Biblia ke tuba, ti, “Adam vwandaka mwana ya bakala ya Nzambi,” kuna na mbatukulu ya kieleka. Adam vwandaka mwana ya bakala ya Nzambi. Mpe nkele yina mpe nsatu yina, mpe nionso, lendaka ve kubasika na mwa masa ya mbote yina.

¹⁷⁶ Yawu fwana katuka na kisika ya kaka. [Kisika ya mpamba na bande—Mu.] Mpe yawu me katuka na Satana, yandi yina

vwandaka muntu yina ke kufwaka bantu, na kubanda. Biblia ke tuba ti, “Na kubanda, yandi vwandaka muntu ya luvunu mpe muntu yina ke kufwaka bantu.” Mpe yawu yayi. Mpe yandi kufwaka mpangi ya yandi ya bakala.

¹⁷⁷ Mpe yina vwandaka kifwanukusu ya lufwa ya Klisto. Kuna, na manima ya yina, kieleka, Yandi basisaka Seth samu na kubaka kisika ya yandi. Lufwa, kukunda, mpe kuvumbuka ya lufwa ya Klisto.

¹⁷⁸ Mpe beno tala mbote, na manima, awa me kwisa bakafumba ya bantu ya beno. Na manima Cain kwendaka na nsi ya Nod. Kana papa ya yandi vwandaka kafumba ya muntu ya nene mingi, wapi mutindu Cain zolaka vwandaka? Mutindu papa ya yandi. Mpe yandi kwendaka na nsi ya Nod, mpe bakaka mosi ya bampangi ya yandi ya kento.

¹⁷⁹ Kaka mutindu yina yandi zolaka sala. Ya zolaka vwanda na bakento ve, kana kaka na nzila ya Eve. Ba tubaka ti bawu kuzwaka makumi sambwadi ya bana ya babakala mpe ya bakento. Kana—kana bakento vwandaka ve...Biblia ke notikaka ve bakento na ntangu ya mbutukulu ya bawu, kaka babakala. Mpe na yina, kana ya vwandaka diaka ve na bakento kana kaka Eve, ntangu yandi kufwaka, muntu zolaka zinga diaka ve. Yandi zolaka vwanda na bana ya bakento. Mpe yandi zolaka kaka kukwela mpangi ya yandi ya kento.

¹⁸⁰ Yandi kwendaka na nsi ya Nod mpe bakaka—mpe bakaka kento ya yandi. Mpe ntangu yandi kwelaka yandi kuna, ya kele na kisika yina bawu talaka bakafumba ya bantu ya nene mingi yina, bayina vwandaka bana ya babakala ya Nzambi yina kubwaka; bayina kwisaka na nzila ya papa ya bawu, diabulu, na nzila ya Cain. Yawu yayi kitini ya beno yina vwandaka kondwa.

¹⁸¹ Mpe beno tala mbote nkuna ya nioka. Ntangu yayi beno tala mbote. Beno bambuka moyo, nkuna ya nioka kele mukwikidi. Beno tala yawu mbote kubanda kusala ntangu yayi, na minuti fioti. Yawu yayi ke na kukwenda, nkuna ya nioka. Yinki salamaka na bawu? Ntangu yayi bika mu tanga kima mosi awa, yina mu sonikaka awa na manima ya midi.

¹⁸² Yinki basikaka na nzila ya Abel? Beno kuwa yayi. Mbote. Abel kwisaka. Na manima ya Abel me kwisa Seth. Na manima ya Seth me kwisa Noé. Na manima ya Noé me kwisa Sem. Na manima ya Sem me kwisa Abraham. Na manima ya Abraham me kwisa Isaac. Na manima ya Isaac me kwisa Jacob. Na manima ya Jacob me kwisa Juda. Na manima ya Juda me kwisa David. Na manima ya David me kwisa Klisto, ya kulunga.

¹⁸³ Beno tala mbote kuna mutindu Mpeve ya Nzambi zingaka na kati ya Abel. Beno tala mutindu Yawu zingaka na kati ya Seth. Beno tala mutindu Yawu zingaka na kati ya Juda. Beno tala mutindu Yawu zingaka na kati ya David. Beno tala Mpeve

kaka mosi vwandaka looka, na nzila ya nkuna ya mbote, ntangu nionso. Ata yina bawu lendaka sala, bawu vwandaka ya kusola.

¹⁸⁴ Beno tala Jacob, muntu ya mvindu. . . Mu ke na kutuba yayi samu na kuvwenza ve. Kasi Jacob, mwa muyibi, yina vwanda kangamaka ntangu nionso na lele ya mama ya yandi; yandi vwandaka pene-pene, mwa mwana mosi ya bakala ya mutindu kento. Yandi tulaka bima na zulu ya yandi, kwendaka mpe vunaka tata ya yandi, samu na kuzwa lusakumunu; kasi yawu kupesamaka na yandi ntete mbatukulu ya yinza. Kieleka, mutindu yina.

¹⁸⁵ Yandi kwendaka kuna mpe vunaka bokilo ya yandi; mpe yandi bakaka bintala yina vwandaka na matona, bintala ya peuplier, mpe yandi tulaka yawu na kati ya masa, samu na kupesa boma na bibulu ntangu bawu vwandaka na kivumu; samu ti bawu kubuta bibulu yina ke na matona, samu yandi vuna mpe kuzwa bibulu yango. Nzambi sakumunaka yandi na yawu. Ya kele kieleka.

¹⁸⁶ Ya kuloka kele muntu nionso yina ke tuba diambu na yina me tala Jacob. Beno zaba yina—beno zaba yina profete ya luvunu tubaka. . . To, yandi pesaka profesi kieleka. Balaam, yandi tubaka, “Muntu nionso yina ke sakumuna yandi ke vwanda ya kusakumuna, mpe muntu nionso yina ke loka yandi ke vwanda ya kuloka.”

¹⁸⁷ “Mu me baka nge, Jacob. Mu ke tala yandi mutindu. . . mutindu na nsi ya yanza. Mpe mutindu mbemba ke balulaka dizanza ya yandi, Mu ke balula yandi mpe ke basisa yandi.” Aleluya! “Na ngolo ve, na lulendo ve, kasi na Mpeve ya Munu, me tuba Mfumu.”

¹⁸⁸ Beno tala mbote mutindu yawu me kulumuka tii na ya kulunga yayi. Mpeve yina salaka tii na ya kulunga na kati ya Klisto, na nzila ya mosi na mosi ya Bankooko, samu na kukuma kuna. Ata nionso yina ti bawu salaka, yina ti bawu tubaka, yina ti bawu salaka, kieleka bawu vwandaka nkuna ya mbote.

¹⁸⁹ Mpe, awa, ntangu Abraham muntu ya mbote. . . Nkembo! Oh, mu ke na kutala kieleka mbote. Ntangu Abraham muntu ya mbote kutanaka na Melchisedek, Yina vwandaka Nzambi Yandi mosi!

¹⁹⁰ Nani vwandaka Melchisedek? “Ntinu ya Salem, yina zola tuba Ntinu ya Jerusalem, Ntinu ya ngemba. Yandi vwandaka na tata ve. Yandi vwandaka na mama ve. Ata mbala mosi ve ti Yandi kuzwaka mbatukulu ya bilumbu, to nsuka ya luzingu.” Ata Nani Yandi kele, Yandi ke na kuzinga diaka. “Ata mbala mosi ve ti Yandi butamaka. Ata mbala mosi ve ti Yandi ke kufwa. Ata mbala mosi ve ti Yandi kuzwaka tata to mama. Ata mbala mosi ve ti Yandi kuzwaka mbatukulu ya bilumbu, to nsuka ya luzingu.” Beno zabisa muni Nani ya vwandaka. Nzambi ya Seko; na yina beto ke bokilaka. . .

¹⁹¹ Oh, mu me zimbana diaka mutindu beno ke bokilaka yawu ntangu yayi. Théophanie, ya kele yina. Ya kele mutindu na . . . Luvunu ve; kasi diaka ya kele kaka kima yina me monisama. Mutindu Yandi kwisaka na Abraham kuna na tenta, mutindu wanzio, mpe pesaka profesi, mpe tubaka na Sara ti yandi sekaka, na manima ya Yandi, mpe nionso yina. Kima, kima kaka mosi.

¹⁹² Mpe awa Yandi vwandaka. Yandi kutanaka Melchisedek. Mpe nkooko ya . . . nkooko ya nkooko ya bakala Abraham, na kati ya nkuna ya mbote, futaka mosi ya kumi na Melchisedek; mpe yawu vwandaka ya kutula na mwana ya mwana ya mwana ya yandi ya bakala ntama kuna, nkuna ya mbote.

¹⁹³ Ntangu yayi awa me kwisa nkuna ya—ya nioka. Ntangu yayi, beno bambuka moyo ti, ya ke vwanda na kuyina, na mvita na kati-kati ya bawu.

¹⁹⁴ Nkuna ya nioka ke na kwisa, mpe yinki yawu ke basisa? Ntangu yayi bika ti beto baka bamvula ya ntete. Ntangu yayi beno tala mbote yinki salamaka awa. Beto ke tanga yawu kuna, samu ti mu vwanda ke tala yawu. Nkuna ya nioka basisaka Cain. Cain kwendaka na yinsi ya Nod, basisaka bakafumba ya bantu, mpe na manima bawu kwendaka na yinsi ya Noé.

¹⁹⁵ Bawu vwandaka na mayele mingi, ya kulongoka, bantu ya mayele. Ya kele kieleka ve? Bawu vwandaka mitungi, ba-inventeur, bantu ya science; na nzila ya nkuna ya mbote ve, kasi na nzila ya nkuna ya Satana, nioka. Bawu vwandaka bantu mutindu—mutindu bantu ya science, mpe mitungi, mpe bantu ya nene, milongisi. Masonukwa ke tuba mutindu yina. Bawu vwandaka sala mutaku. Bawu vwandaka sala kisengo. Bawu vwandaka sala bisengo. Bawu vwandaka yidika bima. Bawu vwandaka kumisa ngolo bisengo ya mutindu nionso, mpe vwandaka tungisaka bayinzo, mpe nionso yankaka yina. Masonukwa ke tuba mutindu yina. Mpe bawu vwandaka seka Nkuna ya kento, Noé, muntu ya mbote. Ya kele kieleka? [Dibuundu me tuba, “Amen.”—Mu.]

¹⁹⁶ Beto landa bawu mwa ntama diaka. Na yawu, bawu yayi na nzaza, kisika nionso bebaka. Ya kumaka kuvukisa ya disumu ya mvindu, mpe bawu bakaka ntwadusulu, mpe ba ya mayele mingi mpe ya mayele. Tii, Nzambi talaka na nsi, ya vwandaka diaka ve na mingi yina bikanaka, na yawu Yandi kotisaka kaka Noé na dikanda ya yandi na kati ya nzaza, mpe fidisaka mvula na nsi mpe bebisaka nionso. Yandi katulaka Enoch, ntete. Ya kele kieleka? [Dibuundu me tuba, “Amen.”—Mu.] Ya vwandaka na nkuna nionso, keba ve nkuna nionso; kasi Yandi vwandaka na dibanza yina zolaka salama.

¹⁹⁷ Ntangu yayi, Noé na bana ya yandi ya babakala, bayina basikaka, Cham, Sem, na Japhet, kubasikaka na dikanda ya mbote.

198 Wapi mutindu nkuna lutaka na lweka yankaka? Nkuna kotaka na nzaza, mutindu kaka yawu salaka na mbatukulu, na nzila ya kento, na bakento ya bawu. Bawu nataka nkuna ya Satana, na kati ya nzaza, mutindu kaka Eve vwandaka nata nkuna ya Satana, samu na kubuta Cain, na nzila ya kento.

199 Beno ke tulaka bakento ya ngo na kisika ya zulu mutindu milongi, Biblia ke bedisa yawu! Paul tubaka, “Kana muntu banza ti yandi kele profete, to muntu ya kimpeve, ti yandi kuzaba ti yina mu me sonika kele misiku ya Mfumu; kasi kana yandi zola kundima ve, beno bika kaka yandi kundima ve.”

200 Ya kele samu na yina mu basikaka na dibuundu ya Baptiste na nsi awa. Mpangi Fleeman vwandaka awa ntama mingi ve; mu banza ti yandi vwandaka kuna na nkokila yango. Mulongisi Davis tubaka, “Nge ke telama awa mpe nge ke byeka bakento yayi mutindu milongisi.”

Mu tubaka, “Mu ke sala yawu ve. Ve, ya kieleka.”

Yandi tubaka, “Mbote, mu ke tula nge na nganda.”

201 Mu tubaka, “Ba me tulaka munu na nganda na bisika kulutula mbote.” Mu tubaka, “Yayi kele Ndinga ya Nzambi, mpe Yawu ke bedisa kima yayi. Mpe mu lenda ve simba ve yina Nzambi ke bedisa.” Ve, tata.

202 Bawu nionso yina ke salaka yawu, ke talisa ti bawu kele milongisi ya luvunu, bapofete ya luvunu. Biblia ke tuba ti bawu ke vwanda yina. “Kana bawu lenda, bawu ke vuna bayina soolamaka.” Beno bawu yayi.

203 Beno tala yayi ntangu yayi. Mpe kubanda kuna, na manima, me kwisa Cham, Cham na kento ya yandi, mpe ba yankaka. Yandi vwandaka ya kuloka. Na Cham me kwisa Nimrod, yina tungaka Babylone. Na Babylone me kwisa dibuundu ya Catholique, na mbatukulu ya yawu. Yawu me luta na Achab. Yawu me luta na Achab, na Judas Iscariot; yawu me suka, na mbeni ya Klisto.

204 Mpe na bilumbu ya suka yayi, mpeve ya mbeni ya Klisto kele awa na Mpeve ya Klisto. Mpeve ya mbeni ya Klisto, ke tuba, “Bilumbu ya bimangu me luta.” Mpeve ya Klisto, ke tuba, “Yandi kele mutindu mosi mazono, bubu yayi, mpe kukonda nsuka.” Mpeve ya mbeni ya Klisto ke tuba, “Ya ke sala kima ve kana beno kele ya kubotama na ‘Tata, Mwana, Mpeve-Santu,’ ti bawu kutiamuna beno masa, bawu kulosa beno masa, nionso yina ya kele, ya zola tuba kaka kima mosi.” Biblia ke tuba ti Nzambi kele yina ke kondwaka ve, mpe Yandi lenda ve kusoba. Nani beno ke sadila? Ya me tala kaka beno.

205 Mbote beno ke tuba, “Bawu lenda vwanda kintwadi? Nge me tuba, ti, kuna na kati ya nzaza, Mpangi Branham, ti bawu zole vwandaka na kati kuna Cham na Seth.” Ya kele kieleka,

ya kieleka ya kulunga. Cham vwandaka muntu ya yimbi. Seth vwandaka musambidi mpe muntu ya mbote. Mbote.

206 Beto landa Cham. Mbote, awa, kele na Cham na Seth na kati ya nzaza mosi; mosi kele mbote, mpe yankaka yimbi. Ya vwandaka na nkwanwa mpe yembe na kati ya nzaza mosi. Ya vwandaka na Judas mpe Yesu na kati ya dibuundu mosi. Ya vwandaka na mbeni ya Klisto mpe Mpeve-Santu na kati ya dibuundu mosi.

207 Mpe, bubu yayi, bampeve kaka mosi ke na kusala. “Bawu ke lakisa mutindu ya kinzambi, ya kulutila ya kukwikama, kasi bawu ke talisa mutindu ya kinzambi mpe ke manga Ngolo ya yandi; kuvwanda ve kintwadi na bantu ya mutindu yina.” Mpeve-Santu, ke tuba, “Yesu Klisto kele mutindu mosi mazono, bubu yayi, mpe ntangu nionso.” Wapi lweka beno ke soola?

208 Mbeni ya Klisto ke tuba ti *Yayi* kele kaka buku ya kinkulu ya bantu. “Beto ke vutukila Credo ya Bantumwa.” Mu ke lomba mulongi nionso na kutuba na munu kisika kele Credo ya Bantumwa na kati ya Biblia: “Mu ke kwikilaka na Nzambi, Tata ya Ngolo nionso, Ngangi ya mazulu mpe ntoto; Yesu Klisto, Mwana ya Yandi. Mu ke kwikilaka na Dibundu ya Santu ya Catholique ya Rome, na kuvukana ya basantu.” Wapi kisika beno me tala yawu na kati ya Biblia? Mpe diaka beno ke vutukila yawu na mabuundu ya beno ya nene ya Methodiste mpe ya Baptiste. Ya kele malongi ya diabulu, mpe bapofete ya luvunu ke na kulongisaka yawu.

209 Mpe mu banza ti mu ke na kunyongisaka beno ve, kasi mu ke na kukotisaka yayi mbote na tabernacle yayi. Beno bayina kele awa na Branham Tabernacle, beno vwanda ntama ya bima ya mutindu yina. Nionso yina ke kwikilaka na kuvukana ya basantu kele malongi ya kuzonza na bampeve ya bafwa. “Ya kele na muvukisi mosi na kati-kati ya Nzambi na bantu, mpe ya kele Yesu Klisto Muntu.” Beno landa ve lutangu ya ba-Marie yina kele!

210 Beno me mona mutindu nkuna ya kento yango salaka kuna? Beno me mona mutindu nkuna ya kento natamaka na lweka yina?

211 Beno tala bubu yayi, na Amerika. Amerika kele nkuna ya diabulu. Yinki ya kele? Yandi kele yinsi ya kento. Beno kuwaka, “Yayi kele yinza ya kento.” Ya kele kieleka. Ya kele yinsi ya kento. Bawu ke talisaka mutindu ya kusala.

212 Mu kwendaka awa, ntama mingi ve, na Suisse. Bakento vwandaka tuba . . . Mwa kento mosi, yina vwandaka na Mpeve-Santu tubaka, “Beni zaba, kana mu kwenda kuna na Amerika, ba ke tubaka bakento ke na kimpwanza.”

213 Mu tubaka, “Bika mu tuba na nge wapi kisika ya ke nataka.” Mpe mu me banda na kutuba na yandi.

Yandi tubaka, “Oh, kiadi, mu zola kima mosi ve ya yina.”

Mu tubaka, “Ya kele kisika yina yawu ke kunataka.”

Beno zaba, bawu ke salaka ve bima kuna mutindu bawu ke salaka awa.

²¹⁴ Yinki ya kele? Bika munu talisa na beno ti Amerika kele kento. Na zulu ya mbongo ya beto ya kele na kifwanisi ya kento. Nionso awa kele kento.

²¹⁵ Beno tuba na munu, ya kele na banganda mingi ve na yinsi, yina lenda . . . Beno lenda tula banganda makumi yiya na mbanza yayi, mpe beno tula bandumba tatu, bakento ya kitoko yina ke yingana na kutambula na bala-bala; bawu ke fidisa mioyo mingi na difelo, na kululaka bawu, kulutila banganda nionso yina beno lenda tula na mbanza. Ya kieleka ya kele ya kulunga.

²¹⁶ Nani ya kele? Ya kele kento. Nani yandi kele? Yandi kele nzambi ya Amerika.

²¹⁷ Beno baka ba-actere ya ntama ya sinema; bawu ke telama awa mpe kele ya kukwelana bambala yiya to tanu, bawu ke zinga na babakala tatu to yiya na mbala mosi; mpe ndambu ya bamagazine yayi ke talisaka yawu mpe ke tubilaka yawu, bayina ke bakaka bafoto ya bawu ya kinkonga awa. Mpe beno bantwenya ya bakento yina ke bakaka bawu mutindu bifwani ya beno, (samu na yinki?) samu mama ya beno ntete beno, keba ve, nkooko ya beno ya kento ntete beno. Beno me mona kisika nkuna yango ya nioka ke na kusalaka? Ya kieleka, ya kele.

²¹⁸ Mpe yinki yawu me sala? Kana ba ke fundisa disumu ya nko bansungi kumi na yiya, na nsi ya musiku, yinki ke vwanda disumu ya nko kana ba fundisa yawu na kilumbu yayi, na yina nkuna ya mbote me lembe na kutala? Mpe Nzambi tubaka ti ntangu ke kwisa, kana Yandi sukisaka ve kusalu, ya zolaka vwanda na mosi ve yina zolaka bikana. Beto kele na ntangu ya nsuka. Beno kwenda sosa muntu ya mbote na nkokila yayi; beno kwenda na bambanza!

²¹⁹ Oh, beno ke tala binama ya dibuundu mutindu ya kusungama na ba-Baptiste mpe na ba-Presbyterien, mpe nionso, mutindu ya lenda vwanda. Kasi bawu kele na kima ve ya kusala na Nzambi kulutila lapin na kuvwata masapatu ya mvula ya mpembe. Bawu zaba kima ve na yina me tadila Yawu! Nionso yina bawu zaba: “Nge kele Muklisto?”

“Mu kele muntu ya Catholique.”

“Nge kele Muklisto?”

“Mu kele Baptiste.”

“Nge kele Muklisto?”

“Mu kele Presbyterien.”

“Nge kele Muklisto?”

“Mu kele muntu ya Pentecote.” Ya ke na kima ve ya kusala na Yawu.

220 Beno kele Muklisto samu ti Nzambi, na nzila ya lemvo ya Yandi, vuukisaka beno. Mpe beno zaba yina me tala Yawu. Mpe kima mosi me sobisa luzingu ya beno, ti beno ke zinga mutindu yankaka. Mpe beno kele muntu ya malu-malu mpe kivangu na kati ya Klisto Yesu. Ya kieleka.

221 Kasi beno me mona kisika kele nkuna ya nioka? Yinki vwandaka nkuna ya nioka? Pité. Beno ke na kulandaka? Pité na Eve. Yinki salamaka na yawu? Yinki nataka yawu? Yinki ya kele na nkokila yayi?

222 Beno tala na ntangu ya ntama, mwa bamvula me luta, ntangu nkunga ya ntete basikaka. Beno bakuluntu, ntangu . . . Bawu vwandaka landila mbote mikunga na ntwala bawu bika yawu kuluta na radio. Mpe ya ntete basikaka, vwandaka, “Beno ningisa, bana ya bakento, beno ningisa, beno talisa makoto ya beno ya kitoko,” mpe nionso mutindu yina. “Beno seka papa na mama, mpe beno sala bawu nionso ‘ha-ha-ha!’” Yina vwandaka ya ntete yina bawu bikaka kuluta. Wapi kisika beno banza ti muntu yango kele na nkokila yayi yina sonikaka nkunga yayi? Yandi kufwaka.

223 Yinki beno ke banza na Clara Bow, yina basikaka ntete mpe yina tubaka, *Courbes Dangereuses*, mpe kento yina ke kinaka na kukatulaka bilele yina fidisaka mafunda ya bamwela na difelo? Wapi kisika beno banza ti yandi kele na nkokila yayi? Yandi kufwaka ntama. Wapi kisika yandi kele, na nzutu yango ya yandi? Yawu kele ya kulala kuna, ya ke na kupola na putulu, mpe misobi na bankusu me kudia yawu. Mpe mwela ya yandi kele kuna na ntwala ya Nzambi ya mbote.

224 Wapi kisika kele muntu yina bakaka kento yina mpe yina sadilaka bawu bilele ya ntama ya mvindu yina bawu ke lwataka, yina vwandaka benda yawu lweka yayi mpe lweka yankaka, mpe yina vwandaka lunga bawu mbote ve? Tubaka, “Samu na yinki bawu ke salaka yawu? Samu na yinki beno ke lwataka bima ya mutindu yina?” Samu beno zola ti babakala kutala beno, mpe ya kele na mutindu yankaka ve na kotalisa yawu.

225 Mpe beno zaba ti ntangu beno ke salaka yawu, mpe ti musumuki mosi ke talaka beno, beno zaba yinki ke salamaka? Na Kiti ya Lufundusu . . . Beno ke tuba, “Mpangi Branham, mu kele ya kukwikama na mutindu nionso na bakala ya munu.” Ba ke bedisa nge samu na pité. Yesu tubaka, “Muntu nionso yina ke tala kento samu na kulula yandi me sala dezia pité na yandi na kati ya ntima ya yandi.” Ntangu bakala yina ke pesa mvutu na yina yandi me sala pité, nani ke vwanda yina me sala ti yawu kusalama? Mutindu beno ke lwataka mpe mutindu beno ke monana.

226 Ntangu yayi, mu zola kutuba ve ti beno fwana kuvwata mutindu mwa kima mosi ya ntangu ya ntama. Kasi, beno lenda monana ya kulutila mutindu mfumu ya kento.

227 Mpe beno ke basika awa mpe beno ke vwata ve bilele, mwa kupe mosi ya nkufi, mpe na kitini ya lele ya kukanga na kizunga ya yawu mutindu *yayi*, mpe mwa mwana ya beno na meso ya yandi mutindu kima yina ba ke tulaka mbombi ya makaya, beno na makaya na yinwa, ke tambula na bala-bala. Beno ke salaka yawu ve na dibanza ya mbote. Beno lenda vwanda muntu yina me sala diambu ya yimbi ve, kasi diabulu ke na kusadilaka beno mutindu kisalulu mutindu kaka yandi salaka na Eve.

228 Samu na yinki ya kele yinsi ya kento? Samu yawu ke na kunataka mbala mosi na kuyala ya Catholique. Yinki ya kele bubu yayi? Beno ke kuwa bawu ata mbala mosi ve kuzonza Yesu. “Mbote ya nge Marie! Marie, mama ya Nzambi! Santu Cecile!” Mitindu nionso ya basantu, ya basantu ya kufwa. Awa ntama mingi ve, awa . . .

229 Mu vwandaka na Mexique, mvula me luta. Awa me kwisa kento mosi ya mputu, yina vwandaka benda. Makoto ya yandi, nionso ya kukatuka mutindu yayi, mpe ya kubumbana; yandi vwandaka dila, mpe vwandaka simba maboko ya yandi. Mpe tata vwandaka tambula, ya kunangula bana zole, yina vwandaka dila; mama vwandaka tala mpasi mingi; samu kento mosi, yina bawu ke bokilaka santu, kufwaka. Bawu vwandaka na kiteki ya yandi na zulu ya mwa mongo kuna. Muntu yina vwandaka zola yandi kufwaka yandi. Mpe samu ti yandi kufwaka mutindu yina, kieleka, yandi kele santu; yandi vwandaka ya Catholique. Na yawu kuna yandi vwandaka kwenda, samu na kufungula masumu; mpe ya lungaka ti yandi kukwenda na kubendanaka mafunda zole ya bitamina, na banzila, samu na kukwenda kufungula masumu.

230 Mpangi-bakala, kana ya kele kima mosi yina mu fwana kusala, Yesu Klisto kufwaka ya mpamba. Na lemvo, mu kele ya kuvulusa; mpe ya kele ve na nzila—na nzila ya munu mosi, kasi na luzolo ya Nzambi, mpe na nzila ya bumbote ya Nzambi.

231 Bimwangisi-nsangu yufulaka munu, bawu tubaka, “Tata Branham . . .” Na mwa, mwa mwana yina kufwaka mpe yina vutukaka na lufwa, mpe mwa bima yankaka. Makumi tatu ya mafunda ya bantu ya Catholique . . . Ve, beno lemvo kila munu. Ya vwandaka makumi zole ya mafunda. Makumi tatu ya mafunda vwandaka na Afrika. Makumi zole ya mafunda ya bantu ya Catholique ndimaka Klisto mutindu Mvulusi ya bawu, na mbala mosi, ntangu yawu salamaka, na yina mu vwandaka na Mexico City. Mpe banganga-Nzambi yina, bawu lendaka ve na kutuba diambu; bantu vwandaka mingi, ya zolaka nata muvusu. Bantu vwandaka ya kulutila mingi na lweka mosi. Na yawu yandi

tubaka, “Tata Branham, nge ke kwikila ti basantu ya beto lendaka sala bima kaka mosi yina nge ke salaka?”

232 Munu na kuzabaka malongi ya bawu, mu tubaka, “Kieleka, kana bawu kele moyo.” Beno me mona? Na yawu, beno lenda ve kuvwanda santu ya Catholique kana beno kufwa ve, beno zaba.

Na yawu yandi tubaka, “Oh, beno lenda ve kuvwanda santu kana beno vwanda ya kufwa ve.”

233 Mu tubaka, “Wapi kisika beno ke tangaka yawu? Paul tubaka, ‘Na basantu yina kele na Ephese,’ mpe bawu yina ba me bokila ya Nzambi. ‘Na basantu yina kele na Ephese,’ yandi vwandaka tanga mukanda ya yandi; mpe basantu vwandaka na bisika yankaka, na Galatie, mpe—mpe ‘basantu ya Rome,’ mpe nionso yina. *Basantu*, ‘bayina kele ya kuvedisa.’ Beno ke zonza yinki landila yayi?”

234 Yandi tubaka, “Kieleka, ntangu yayi, na kutala beto lenda swana ve na Biblia. Samu ti, beto kele dibuundu, mpe ya kele yina dibuundu ke tubaka. Beto ke kipe ve yina Biblia ke tubaka. Ya kele yina dibuundu ke tubaka.” Yandi tubaka, “Yinki kele dibanza ya beno na dibuundu ya Catholique?”

235 Mu tubaka, “Ya zolaka vwanda mbote ti nge yufula munu yawu ve. Na yina nge me yufula munu, mpe mu ke tuba na nge Kieleka.”

Yandi tubaka, “Mbote, mu zola ti nge tubila munu Kieleka.”

Mu tubaka, “Mutindu ya kulutila nene ya malongi ya kuzonza na bampeve ya mafwa yina mu zaba.”

Yandi tubaka, “Wapi mutindu beno me kuzwa yawu?”

236 Mu tubaka, “Nionso yina ke sambilaka samu na mafwa kele muntu ya malongi ya kuzonza na bampeve ya mafwa.” Mu tubaka, “Kana santu yina kuzonza diaka, kuna yandi kele na difelo. Samu ti, bayina me sabukaka nzila, Biblia ya munu—ya munu ke tuba ti yandi lenda ve kuvutuka.” Ya kele kieleka. Mpe mu tubaka, “Kana ya salama, kana yandi vwandaka santu, ya kele diabulu yina ke na kuzonza mutindu santu, mpe ya kele ve santu, na nionso.”

237 Mpe yandi tubaka, “Mbote, ntangu yayi, vingila fioti.” Yandi tubaka, “Beno mpe, beno ke sambilaka samu na mafwa.”

Mu tubaka, “Wapi kisika?”

Yandi tubaka, “Yesu Klisto kufwaka.”

238 Mu tubaka, “Kasi Yandi vumbukaka diaka. Yandi kele ya kufwa ve. Kasi Yandi kele moyo, samu na kusambila, mpe muvukisi kaka mosi na kati-kati ya Nzambi na bantu.”

239 “Mu kele Yandi yina vwandaka ya kufwa, mpe kele moyo diaka, mpe kele moyo ntangu nionso. Mu ke na bafungula ya lufwa mpe ya difelo.” “Yina nionso zola, bika yandi kwisa mpe

kunwa na masa ya Luzingu ya mpamba.” Oh, la la! Yina kele Nzambi ya beto. Yina kele Nzambi ya beto.

²⁴⁰ Mpe nkuna ya mbote na yina ke na kulendaka ve. Beno zonza na bantu na yina me tadila bima yayi. Beno zonza na bantu na yina me tadila kuvutuka na nzila ya Biblia. Beno zonza na bantu na yina me tadila bimangu. Beno zonza na bantu na yina me tadila yina. Ya bawu “dibuundu ke kwikilaka Yawu ve,” na yawu bawu kele bana ya makangu, samu na Nzambi. Biblia ke tuba kana beto lenda ve kundima kutala mpasi, mpe bantontolo, bakuseka, mpe ti ba bokila beto “ba-exalté” mpe nionso yina, ya mutindu yina, kana beno lenda ve kundima yawu, beno kele bana ya makangu, mpe bana ya Nzambi ve. Biblia ke tuba mutindu yina.

²⁴¹ Beno bokila munu “exalté,” kana beno zola. Beno bokila munu nionso yina beno zola. Ntangu nionso yina ntima ya munu ke vwanda ya kusungama na Nzambi, mpe ti kimbangi ya munu ke tambula kintwadi na Biblia ya Nzambi, mu ke landila na kutambula na lweka kaka yina. Yinga, tata. Ya kele yina beto ke kwikilaka. Yina kele Dibuundu ya Nzambi ya moyo, yina me basika ve na nzila ya luzabu ya bunzambi. Yawu me basika ve na nzila ya yina muntu me sala, na mutindu ya kutala na mayele ya muntu. Yawu me basika na nzila ya bukieleka ya luzayikisu ya Kieleka ti Yesu Klisto kele Mwana ya Nzambi.

²⁴² Kana mu vwandaka kaka na mutindu ya kutala na mayele ya muntu, samu ti dibuundu ya Baptiste to dibuundu ya Methodiste tubaka na munu ti mambu *yayi mpe yina*, na yina mu ke kuwa Biblia yayi, kana Biblia. . . Kana mu kuzwaka mbotika na nkumbu ya “Tata, Mwana, mpe Mpeve-Santu,” mpe ti mu kutanga Biblia yayi, mpe ti mulongi kuzonza na munu ti ya vwandaka ve na muntu na kati ya Biblia yina ba botikaka mutindu yina kasi na Nkumbu Yesu Klisto, mpe ti mu me kutanga yawu mpe ti mu me mona yawu Kieleka, mu ke kwenda na masa mutindu nionso mu lenda na mbangu. Yinga, tata.

²⁴³ Kana muntu zonza na munu ti—ti Yesu Klisto vwandaka munganga ya nene, mpe ti dibuundu ya munu kuzonza na munu ti, “Bilumbu ya bimangu me luta,” mpe ti mu ke na nsatu ya kubeluka, mu ke kwenda mutindu nionso mu lenda na mbangu, na diziku yina, samu na kuzwa kubeluka ya nzutu. Kieleka mu ke sala yawu.

²⁴⁴ Kana mu vwandaka mulongi, mpe ti mu kele na kento yina kele mulongi na kisika ya kulonga, mpe ti mu kutanga na kati ya Biblia yayi mpe kumona ti kento zolaka ve kulonga, mu ke katula yandi kuna, ata ti ya nata munu na lufwa.

²⁴⁵ Mpe beno bambuka moyo, ya vwandaka na manima kuna kisika kele Mpangi-kento Wright, mpimpa mosi, ti kento mosi zolaka kulosa munu na nganda na yina mu salaka kima ya mutindu yayi. Yinga, tata. Mu tubaka, “Nge ke kwisa ve na

dibuundu ya munu na bima ya nge ya ntama. . .” Yina bawu vwanda lwataka, to kuzenga mazwela ya bawu na nsi mutindu yayi, mpe kima yina vwandaka mbote ve na kutala, mpe keba ve ndambu ya banzutu ya bawu vwandaka na nganda. Mu tubaka, “Bawu kwisa ve na dibuundu ya munu, kieleka mu ke tula bawu na nganda.” Mpe mwa kiseki mosi awa, yandi kufwaka ntama mingi ve na manima ya yawu; mpe kuna yandi bokilaka munu, na yina yandi vwandaka kufwa. Yandi vwandaka mwana-kento ya Catholique, yandi me belama na zulu kuna mpe me vwanda na yawu mutindu yayi. Mu vwandaka tala na mudindu mpe mu vwandaka tala yandi mbote, munu ya kuvwanda na zulu awa, mpe bawu vwandaka yimba. Mu katulaka kazaka ya munu, mu kwendaka na mudindu kuna, mu tulaka yawu na zulu ya mapeka ya yandi. Mu tubaka, “Mama, kana nge ke kuwa munu kulonga, nge zola kwandi lemvo ya nge kuvwata kazaka yayi na yina nge kele na kati ya dibuundu ya Nzambi.” Beno me mona? Kieleka.

²⁴⁶ Yandi me basika na kubulaka dikulu, mpe yandi me byeta mwa bikoba ya yandi. Yandi me basika na dibuundu. Yandi me tuba, “Kana ya kele lukwikilu yina kele na yandi, mu ke bika ve ngombe ya munu kuvwanda na mutindu ya lukwikilu ya mutindu yina.”

Mu tubaka, “Beno tala mpasi ve, yandi ke kuzwa yawu ve.”

²⁴⁷ Na manima beto kuzwaka tenta, bawu bokilaka munu na yina yandi vwandaka kufwa. Ntima kangamaka yandi, mpe yandi vwanda kufwa. Bakala ya yandi kwisaka. Yandi tubaka, “Nge, lenda kwisa mbangu!” Mpe mu vwandaka yimeni na kati ya lukutakanu. Bakala mosi ya nene, ya yinda, ya kutelama na mwelo, na kuingilaka munu. Mpe mu me sala mbangu mutindu. . .

²⁴⁸ Mu me kota na ditoma ya munu mpe mu me kwenda kuna na mbangu. Na yina mu vwandaka mata, mu kutanaka na kibuki yayi ya ntama kuna, yina ke vwandaka diaka, na Howard Park. Yandi tubaka, “Reverend, ya mpampa kwandi nge me kwisa.” Ya salamaka na kutala bamvula makumi zole, keba ve bamvula mingi diaka. Yandi tubaka, “Yandi me kufwa.” Yandi tubaka, “Yandi me kufwa na kutala baminuti tatu.” Yandi tubaka, “Yandi bokilaka nge, na ngolo nionso yina yandi lendaka.” Yandi tubaka, “Mu ke na nsangu samu na nge.”

Mu tubaka, “Yinki?”

²⁴⁹ Yandi tubaka, “Zonza na mulongi yina, yina mu tubaka yina, ‘Lemvo ya nge lemvo kila munu.’”

²⁵⁰ Mu kwendaka kuna samu na kutala yandi. Kento ya kitoko; mpe yandi talaka mpasi mingi. Yandi vwandaka na mwa matona ya rousseur na mbombo ya yandi; kento mosi ya kitoko. Mpe matona ya rousseur, vwandaka talana mutindu ti, yawu vwandaka basika. Mpe meso ya yandi vwandaka me basika nionso na dibulu ya meso, mpe vwandaka ndambu ya kubaluka.

Kieleka ti, misopo ya yandi mpe luketo salaka, mpe nsunga vwandaka basika bisika nionso ya mfulu, mutindu yayi.

²⁵¹ Mpe bakala ya yandi me tala munu, yandi tubaka, “Mpangi Branham, sala kisambu, samu ti yandi vwandaka zola kumona nge.”

Mu tubaka, “Kisambu samu na yandi ntangu yayi ke sala ata mbote ve.”

²⁵² “Yiti ke kubwaka, na lweka yina yawu ke petaka.” Beno me mona? “Beno kuvunama ve; ba ke sekaka ve Nzambi. Yina muntu ke kuna, yandi ke buka yawu.”

²⁵³ Beno me mona kisika ya kele? Ntangu yayi yinki salamaka? Beno tala kento yina ke sala yawu. Beno tala bakento yina zingaka ntete, mwana-kento yina ke binaka na chorale, nani vwandaka mwana ya yandi ya kento? Ntwenya ya kento ya kukondwa nsoni. Nani kele mwana-kento ya ntwenya ya kento ya kukondwa nsoni? Ntwenya ya kento ya rock-and-roll. Wapi mutindu ke vwanda mwana ya yandi ya kento? Hum! Yinki ya kele?

Beno me mona nkuna ya mbote?

²⁵⁴ Beno tala beno ba-Baptiste. Beno vutuka ndambu na ntangu ya ntama. Beno vutuka na John Smith, muntu ya beno yina bandaka, beno ba-Baptiste. Ntangu, yandi vwandaka sambila samu na masumu ya nko ya bantu, tii, yandi vwandaka dila mpe kusambila samu na bantu tii meso ya yandi na kuvwandaka ya kukangama vwandaka vimba, mpe kento ya yandi zolaka kudikisa yandi na mesa, madia ya yandi ya suka.

²⁵⁵ Mpe beno ba-Methodiste, bayina kele awa, na misanga na bambombo ya beno mpe na makutu, mpe beno ke talana mutindu bakiti ya bakento na kunata mpunda ya diabulu; mpe beno ke basika, ya kulwata bakupe, mpe bima ya mutindu yina! Na yina, John Smith kuluntu, mosi ya bakuluntu ya dibuundu ya Methodiste, ntete yandi kufwa na makumi nana na tanu ya bamvula, longaka dilongi mosi ya nkufi bamvula yiya, to, ngunga yiya. Bawu zolaka nangula yandi mpe kutula yandi na kisika ya kulonga. Mpe yawu yayi bampova ya yandi ya nsuka. Yandi tubaka, “Mu kele ya kunyonga mingi na mvwandulu ya dibuundu ya Methodiste.” Yandi tubaka, “Bana ya bakento ya dibuundu ya Methodiste mpe ke na kulwataka mulunga ya wolo na misapi.” Yinki yandi lendaka tuba ntangu yayi, na bakupe, kuyimbaka na chorale?

²⁵⁶ Beno vwandaka kima mbote. Yinki me salama? Beno ke na kusalaka mutindu mama ya beno. Ya kele kieleka yina.

²⁵⁷ Ya kele samu na yina beto zola ata mosi ve ya ba-denomination yayi ya kukangama, na yayi, na dibaya awa: “Beto kele ba-Methodiste. Beto kele ba-Baptiste.” Beto kele

kaka ya Klisto. Beno bika yawu mutindu yina, beno vwanda na kimpwanza.

258 Ntangu yayi, beno me mona nkuna ya nioka? Wapi mutindu ya ke vwanda samu na kento ya mutindu yayi? Yinki yina ke sala? Yinki? Bawu me landila, na kukulumuka. Bawu me vutula na manima ba-Baptiste, bawu me vutula na manima ba-Methodiste, bawu me vutula na manima ba-Presbyterien. Yinki bawu salaka? Bawu nionso vutukaka mbala mosi na manima, mutindu mama ya bawu, ya ntama ya ndumba. Kuna bawu nionso ke, na kusalaka kindumba kaka mosi. “Mbote, ya ke sala ata luswaswanu mosi ve. Ba kotisaka bawu na masa. Ba mwangisaka bawu masa. Bawu, bawu kwisaka, fungula masumu. Bawu zitisaka musiku ya bawu ya kusala mpe kuteka malafu ya ngolo na bangonda sambanu; bawu kunwaka malafu mingi ve na ntangu yango, mpe nionso yina. Bawu vwandaka bandimi ya mbote. Bawu vwandaka futa mbote. . .” Oh, la la! Yina ke na kima mosi ve ya kusala na bambuma ya Kimpeve.

259 Bambuma ya Kimpeve kele “lukwikilu,” kukwikila Yesu Klisto mutindu mosi mazono, bubu yayi, mpe ntangu nionso; “luzolo” samu na bampangi; “nsayi, kizunu, mvibudulu, bumbote, kusalasana, kukanga-ntima, lembami, kuzaba na kukutika nzutu.” Yina kele bima, bambuma ya Kimpeve.

260 Mpe beto baka bakala mosi, “Mbote, yandi–yandi ke zingaka mbote na bamfinangani.” Esau mpe salaka mutindu yina.

261 Ata mbala mosi ve ti Esau talisaka muntu mpasi, mpe Esau vwandaka ya diabulu; kasi Jacob, yina basikaka na kivumu kaka mosi, vwandaka ya Nzambi. Nkuna ya diabulu; Nkuna ya kento, Nkuna ya Nzambi basikaka.

262 Ntangu yayi, beno me mona, yawu nionso me kulumuka na yayi, na yina yinki me bikana na yinza bubu yayi? Mu ke tuba yayi na ngolo nionso, kukotisa yawu mbote, kuna beto ke banda lukutakanu ya mvumbukulu na manima ya yayi, na lukutakanu yina ke kwisa. Ya me kuma mutindu. Mpe, lemvo ya beno, mu ke tuba yayi ve samu na kuvwenza. Mu ke na kutuba yayi ve samu na kuvwanda muntu ya yimbi. Ya me kuma na kisika, na nkonga, ya bana ya nsambulu ya makangu, bana ya makangu. Ya kele mitindu ya munu ya kutala ya mansukina. Ya kele ya kieleka na yina beto me kuma. Beno zaba ti yina kele kieleka. Ya me kuma na kisika tii ya kele kuvukana na dibuundu mpe bandimi ya dibuundu, “Bawu ke lakisa mutindu ya kinzambi, kasi ke manga Ngolo ya yawu,” tii ya ke kuma nkonga ya bana ya makangu, ya misambidi. Ya kele kieleka nionso yina ya kele.

263 Yinki me bikana na kukwisa? Ya kele na munduki ya nene ya kulelama kuna, yawu mingi, kingundu ya cobalt mpe nionso yankaka. Bawu ke na kuingilaka kaka ngunga kukuma. Mpe

ya ke vwanda na mwangusulu na tiya, mutindu ya vwandaka na masa.

²⁶⁴ Mpe, bankundi, nionso yina beno ke sala, kana beno kele Muklisto mpe ti beno ke na Nzambi na ntima ya beno, mpe ti beno zaba ti beno me katuka na lufwa na Luzingu, beno fwana vwanda muntu ya kiese mingi na yinza nionso.

²⁶⁵ Ntangu Mpeve-Santu na kati ya beno. . . Ntangu Biblia ke tuba, “Yesu Klisto kele mutindu mosi mazono, bubu yayi, mpe ntangu nionso”: ba-denomination ke tuba, “Kasi beto ke kwikilaka ti bimangu lutaka”; Mpeve-Santu ke tuba, “Amen, Yesu Klisto kele mutindu mosi mazono, mpe ntangu nionso. Ya vwanda mutindu yina.”

²⁶⁶ Kana Biblia me tuba, “Beni soba nkadulu, mpe konso muntu ya beno kubotama na Nkumbu ya Yesu Klisto samu na lemvo ya masumu, beno ke kuzwa dikabu ya Mpeve-Santu. Samu ti nsilulu kele ya beno, mpe ya bana ya beno, samu na Bantu-yamakanda, samu na bayina nionso kele ntama, lutangu mutindu Mfumu Nzambi ya beto. . .” (Lutangu mutindu Mfumu Nzambi ya beto ke bokila, ke mona, lutangu mutindu ve ba-Methodiste ke bokilaka, ba-Baptiste ke bokila, kasi lutangu mutindu Mfumu Nzambi ya beto ke bokila, ke kuzwa Mpeve-Santu yayi, mpe ke botama na Nkumbu ya Yesu Klisto, ya kele yina Biblia ke tuba): ntangu ya ke kota beno, beno ke tuba, “Amen!”

²⁶⁷ Dibundu ke tuba, “Oh, ya ke sala ata luswaswanu ve.”

²⁶⁸ Kasi Mpeve-Santu yayi na kati ya beno ke tuba “amen” na Ndinga ya Yandi.

²⁶⁹ “Muntu lenda zinga kaka ve na dimpa, kasi na Ndinga yina me katuka na yinwa ya Nzambi.” Beni bawu yayi.

²⁷⁰ Mu zola ti beno kulakisa munu Masonukwa mosi kisika ba tubaka ti pomme bandaka diambu awa. Mu zola ti beno kulakisa munu ti bawu kudiaka ba-pomme. Mu me lakisa beno kisika yina Cain banzaka diambu kaka mosi, mpe kisika nkuna ya yandi ke na kulandila na kubanza kaka diambu mosi.

²⁷¹ Kasi luzayikisu ya kimpeve ya Nzambi ke lakisa, na nzila ya Biblia, ti ya vwandaka kuvukana ya bakala na kento, na mutindu ya musiku ve. Ya kele kisika yina bakafumba ya beno ya bantu kwisaka. Ya kele kisika yina disumu ya beno kwisaka. Ya kele kisika yina kubeba ya beno kwisaka. Ya kele kisika yina ya kubwaka.

²⁷² Ntangu yayi beno tala na nionso yayi—yayi, beno tala, nioka vwandaka bambala zole mayele. Ntangu nionso nkuna ya yandi ke vwandaka bambala zole mayele. Mpe mu zola kumata na zulu ya kisika ya kulonga yayi mpe kubaka kinzonzolo yayi na diboko ya munu, mpe kukangama na zulu ya kisika ya kulonga, mpe kutuba yayi. Mpe, bubu yayi, wapi kisika kele bantu ya beno ya mayele ya nene? Pasteur ya beno yina kwendaka kuna mpe yina

kuzwaka luzabu ya mayele ya nene, mpe yandi ke telama; yandi kele pasteur ya mabuundu ya kulutila nene yina kele na kati ya yinsi, mpe nionso ya mutindu yina. Wapi kisika kele nkuna ya nioka? Na bisika ya kulutila mayele ya mayele ya mutindu yina; bantu kulutila mayele, mayele ya yimbi. Ya kele kisika yina yandi kele. Ya kele kisika yina yandi kele ya kuvwanda.

273 “Na nzila ya ngolo ve, na nzila ya lenda ve, kasi na nzila ya Mpeve ya Munu, me tuba Mfumu.” Beno me mona? Ya kele kisika yina beno. . .

274 Kuna beno baka mwa mpangi mosi ya bakala ya kuvwanda na nsongi, yina ke na kudila mingi, mpe yina lenda vwanda ke na kubula guitare, ke tuba, “Mpangi-bakala, kwisa, zaba Mfumu!”

275 Pasteur ke lutila kuna, yandi ke tuba, “Huh! Mu ke ndima ve ti kimvuka ya munu. . . Oh, mu ke ndima ve kuvukana, mu ke bika ve ti ya munu. . . mu ke bika ve ti Liddy mpe Johnny mpe ba yankaka kumona munu pene-pene ya kisika mosi ya mutindu yayi.” Beno landila, nkuna ya diabulu, beno ke na kutambula na kisika ya beno ya Seko, na kutala. Ya kele kieleka. Mu lenda tuba diambu ya kaka awa, mpe kutuba “bana ya makangu,” mpe ya kele na kutala kaka kisika yina ya kele. Samu ti, beno me mona, beno. . .

276 “Muntu ve lenda kwisa na Munu kana Tata ya Munu kubenda yandi ve. Mpe bawu nionso yina ke kwisa na Munu, Mu ke vumbula bawu na kilumbu ya nsuka. Ata kima ve ke zimbana. Mu ke na yawu. Mu ke bumba yawu. Muntu ve lendaka sala yawu, kana Yayi.”

277 Nionso kele ya kuvwanda na kati ya Yandi. Beno lenda ve kutuba, “Mu me sala kima mosi.” Ya kele lemvo ya Nzambi yina salaka yawu nionso. Na yawu, kima ve mu salaka. Ata mbala mosi ve ti mu salaka kima; beno mpe, ata mbala mosi ve. Ata mbala mosi ve ti beno salaka na kuzwa kima mosi. Nzambi salaka konso ndambu ya yawu. Ata mbala mosi ve ti beno me balulaka musapi ya beno samu na kitini mosi ya yawu. Beno tuba ve, “Mbote, mu ke basika na dikanda ya mbote. Mu salaka yayi.” Yina ke na kima mosi ve ya kusala na yawu. Nzambi kele Yandi Yina salaka yawu; kiadi ya Nzambi.

278 Lemvo ya beno ntangu yayi, ya me kuma ntete ve ngunga kumi na mosi ya mpimpa, kasi mu ke manisa, na mutindu nionso. Beno me mona?

279 Bantu yikwa me bakula ti Biblia ke zonzila na bima yayi ti ya kele Kieleka? Mingi-mingi, beno bantu ya Branham Tabernacle. Ntangu yayi, yina ke kaka na kutala mosi ya kumi na sambanu ya yina beto ke longaka mpe ke kwikilaka. Kasi, beno bambuka moyo, na beno bayina ke kwisaka na kutala, mu zola kutuba yayi, na beno bantu yina ke kwisaka awa mutindu bandimi ve. Mutindu beto ke kwikilaka yayi, ti Yayi kele Biblia, mpe ti Biblia kele Kieleka ya Nzambi.

280 Mpe beto ke kwikilaka, ti, na Ngwisani ya Ntama, awa, ti bawu vwandaka na mutindu ya kuzaba yina vwandaka kieleka mpe yina vwandaka kieleka ve.

281 Ntangu yayi, beto nionso zaba ti bawu vwandaka na musiku ya kusonama. Bantu yikwa zaba yawu? Musiku, misiku vwandaka na kati ya nzaza, mpe nionso yina; mbote, mpe musiku na misiku. Yandi tubaka, “Beno ke sala pité ve. Muntu nionso yina ke sala pité ba ke losa yandi matadi.” Beno me mona? Yina vwandaka musiku, mpe musiku na musiku. Ntangu yayi, nzaza vwanda vwandaka mutindu *yayi*; misiku vwandaka na kati kuna, mpe misiku ya misiku vwandaka na kati ya baposi na lweka ya nzaza. Kana muntu kwisa awa, yina me sala pité; yandi kuma awa mpe ti yandi kutanga yina musiku me tuba, “beno losa yandi matadi.” Bawu ke nata yandi na mbangu na nganda mpe ke losa yandi matadi. Yina kele yina musiku vwandaka na musiku.

282 Ntangu yayi bawu vwandaka na mitindu diaka zole samu na kuzaba. Ya ke vwandaka ntangu nionso na tatu, mutindu kusiamisa. Bawu vwandaka na mutindu yankaka diaka samu na kuzaba, mpe yina vwandaka keba ve na nzila ya profete to na nzila ya muntu ke lotaka. Bantu yikwa zaba yawu? “Kana ya kele na mosi na kati-kati ya beno yina kele ya kimpeve, to profete, Munu Mfumu ke sala ti ba zaba Munu na yandi na bandosi, mpe ke zonza na yandi na ba-vision.” Yina kele kieleka. Ntangu yayi, yandi vwandaka muntu yina ke pesaka profesu.

283 Ntangu yayi, kana muntu kwisa, yandi kutuba, “Oh, Aleluya, mu me kuzwa yawu! Mu ke na kupesaka profesu ntangu yayi na Nkumbu ya Mfumu. Mu me kuzwa luzayikisu.” Bawu vwandaka bika yawu kukwenda ve mutindu yina, mutindu beno bantu ke salaka. Bawu vwanda tadidilaka yawu na nzila ya Nzambi, ntete.

284 Ntangu yayi, na zulu ya kinkuti ya Aaron ya vwandaka na yina bawu ke bokilaka Urim Thummim. Bantu yikwa me kuwaka mpova yayi? Yinki yawu vwandaka? Ya vwandaka matadi kumi na zole, konso sambanu na lweka, ya kumi zole ya bankooko; jaspe, Juda, mpe nionso yina, mpe mutindu yina, matadi kumi na zole. Mpe kuna bawu ke baka profete yayi, to muntu ke lotaka yayi, mpe bawu ke tula kinkuti yayi, mpe bawu ke telemisa yandi kuna. Mpe bawu ke tuba, “Ntangu yayi muntu ya profesu tuba profesu ya nge.”

“Mfumu me zonza na munu mpe me tuba mambu yayi—mambu yayi.”

285 Ata wapi mutindu kieleka ya zolaka monana, ya lendaka wakana mutindu ti ya kele kaka ya kulunga ya kieleka; kasi kana bambwetete yina kwisa ve kintwadi mpe basisa ve bantinta ya nkongolo kuna, Urim Thummim, bambwetete yango kuvukana kintwadi, kimpeve na kosalu, kusiamisa. Beno me mona, Nzambi

ntangu nionso ke singisaka Ndinga ya Yandi. Beno me mona? Kana bambwetete ya kimpeve yango yinganaka ve kuna, kuna mu ke kipe ve mutindu ya ke monana, ya kele luvunu.

²⁸⁶ Kana muntu yina ke lotaka kutuba, “Mu me lota ndosi, mpe ndosi yango me tuba, ti, ‘Israel fwana kukatuka awa mpe kukwenda na kisika mosi, samu ti bantu ya Syrie ke kwisa na lweka *yayi* mpe ke baka kisika yayi.’” Bawu ke nata muntu yina me lota kuna; yandi ke zonza ndosi ya yandi. Kana bambwetete yango kuvukana ve kuna, yandi me vuna, ata wapi mutindu. . . Kana bantu ya Syrie vwandaka yimeni ya kuvwanda na mvita na zulu kuna, yandi me vuna. Ve, tata. Bawu, kieleka, Urim Thummim zolaka singisa yawu.

²⁸⁷ Ntangu yayi muntu nionso zaba ti kinganga-Nzambi ya ntama me zimbana, yawu kufwaka na yawu, mpe Urim Thummim kufwaka na yawu. Beto zaba yawu, mutindu yina ve? [Dibuundu me tuba, “Amen.”—Mu.]

²⁸⁸ Mpe kinganga-Nzambi ya malu-malu me kwisa. Yinki? Beto ke na Urim Thummim bubu yayi? Yinga, tata. Ndinga ya Nzambi! Yinga, tata. *Yayi* kele yawu. Kana muntu nionso kuzwa mutindu nionso ya luzayikisu, to kuzonza kima, to malongi nionso yina ke vukana ve mpe ke te- . . . mpe ke telama ve na Biblia yayi, landila Masonukwa nionso, yandi me vuna. Mu ke kipe ve wapi denomination yina yandi kele, wapi mutindu mbote yandi kele, wapi mutindu ya mayele mingi kele na yandi, mutindu yandi longokaka; yandi me vuna.

²⁸⁹ Mpe ntangu muntu nionso ke tuba na beno mambu yayi, yina beto me tubila awa na kati ya dibuundu awa, mpe ti yandi kutuba na beno, ti, “Kana ba me mwangisa beno masa, ti yina kele yimbi ve,” yandi me tuba na beno luvunu. Yina ke pesa nsemo ve na Urim Thummim. Ntangu yandi ke tuba na beno, ti, “Kutiamuna masa kele yimbi ve,” yandi me tuba na beno luvunu. Yandi ke tuba na beno, “Kubotama na nkumbu ya ‘Tata, Mwana, Mpeve-Santu,’ kele yimbi ve,” yandi me tuba na beno luvunu. Kana yandi tuba na beno, “Bilumbu ya bimangu me luta,” yandi me tuba na beno luvunu. Kana yandi tuba na beno, “Ya kele yimbi ve samu na bakento na kulonga,” yandi me tuba na beno luvunu. Kana yandi tuba na beno, “Ya kele yimbi ve samu na beno na kulandila na kukangama na dibuundu ya beno ya nkumbu,” yandi me tuba na beno luvunu. Yawu ke pesa nsemo ve na Urim Thummim. Mpe bima kumi na zole yina basikaka, na “MAMA YA KINDUMBA” ya ntama yayi, mpe yawu me kulumuka kuna, mpe ya kele samu na yina beto kele ntama na denomination.

²⁹⁰ Beto zola bampangi ya beto ya babakala mpe ya bakento yina kele na kati ya ba-denomination yina. Kasi beno kwenda ve, mpe beno tuba ve, “Mu kele Methodiste,” mpe ti yina ke sala beno Muklisto, samu na munu. Beno kele Muklisto samu

beno me butuka na Mpeve ya Nzambi. Beno fwana vwanda ve Methodiste to Baptiste. Beno fwana vwanda yayi to yina ve. Beno fwana vwanda kaka ya kubutama na Mpeve ya Nzambi. Beno me kwikila yawu? [Dibuundu me tuba, “Amen.”—Mu.]

²⁹¹ Landila lufulu yayi, kana muntu awa zola kusala kintwadi mpe yina zola kukota na kimpangi ya kukembila yayi, mpe yina zola—yina zola kukota na masa, kuzwa mbotika na Nkumbu ya Yesu Klisto, ndonga ya nene ya masa yawu yayi. Ba ke sala mbotika, na mwa minuti.

²⁹² Kana ya kele na muntu, mingi awa, muntu nionso yina zola kukwisa, na mutindu nionso yankaka? Beto kele awa. Ya kele kieleka.

²⁹³ Ntangu yayi, beto—beto ke na bakate ve samu na bandimi; beno kwisa kaka na dibuundu yayi awa. Beto ke kwikilaka ti Klisto kele na kati ya dibuundu ya Methodiste, na dibuundu ya Baptiste, na dibuundu ya Presbyterien. Yandi kele na bandimi na konso mosi ya yawu. Mpe yina ke na kukondwaka, bubu yayi; kele profesu ya luvunu yina ke na kubasisaka bima yayi, malongi ya mabuundu yayi, yina kele kieleka ya kuswaswana na Biblia.

²⁹⁴ Ntangu yayi, kana muntu lakisa Yawu mpwelele na munu, kieleka ti mu ke kwenda . . . Mu ke kwikila ti Mpeve ya Nzambi kele ya kufwana na kati ya munu, na kutala mbote Biblia yayi mpe kukwisa mpe kusungika yawu. Kana mu kwenda mpe ti mu kupesa diboko na mulongi, mpe ti mu kutula nkumbu ya munu na buku, mpe ke landila na kuyina mpe kusala yimbi na kati ya ntima ya munu, mpe ke landila na kimpala mpe mindondo, mpe ke landila na kukwikila ve ti Yesu Klisto kele Munganga ya nene, mpe nionso ya mutindu yina, mu ke kwenda sungika yawu na Nzambi, na nswalu nionso. Kieleka mu ke kwikila ti mu ke sala yawu. Mu—mu ke vuna ve na yina. Mu ke kwenda sungama na Nzambi. Kana mu vwandaka kaka ya kukangama samu ti mu vwandaka Baptiste to Methodiste, mu ke fukama mpe ke kotisa Buklisto na kati ya ntima ya munu. Mu ke sala yawu. Yinga, tata.

²⁹⁵ Ntangu yayi beno bambuka moyo na mvumbukulu yina ke na kwisa, yina ke banda, kana Mfumu zola, na nkokila ya Kilumbu ya tatu yayi yina ke na kwisa. Ya ke vwanda landila misiku yayi.

²⁹⁶ Beno kuwa, bankundi, ya kele na Nzambi ya kieleka mpe ya moyo. Ya kele kieleka. Yesu Klisto kele Mwana ya Nzambi. Mpeve—Santu kele na kati ya Dibuundu bubu yayi.

²⁹⁷ Ntangu yayi, kana ya vwandaka muntu kaka tubilaka munu yawu, mu zolaka kuzwa muswa ya kusala ntembe na yawu. Kasi, beno kuwa. Kilumbu mosi kuna, ntangu mu vwandaka mwana ya fioti ya bakala, mu vwandaka ya kutelama na nsi ya yinti; Mu monaka Yandi. Mu kuwaka Yandi. Yandi tubaka na munu, ya tubaka, “Vwanda ntama ya bakento ya yimbi. Vwanda ntama ya makaya. Kanga nzutu na kuvwenza, na kunwa malafu, mpe bima nionso yina. Mu ke na kisalu samu na nge na kusala ntangu nge

ke kula.” Mu zaba ti Yandi ke kieleka, Nzambi ya moyo yina ke kengilaka na Ndinga ya Yandi.

²⁹⁸ Ntangu mu kulaka fioti, mutindu Yandi bwabanaka munu, mutindu Yandi zonzaka na munu! Mutindu mu monaka Yandi kuna, mutindu divunda ya tiya, mpe Tiya yina vwandaka baluka kuna! Mutindu mu monaka Yandi kuzonza mpe kutuba na kieleka nionso yina zolaka salama; mpe, konso ntangu, kusalama na mutindu ya kulunga kaka mutindu ya zolaka vwanda, ya kulunga mutindu yina.

²⁹⁹ Yina kaka tubaka mambu ya kulunga yayi na mutindu yina, ke kaka Yandi Yina ke pesaka munu dibanza ya kulunga Biblia yayi kaka mutindu mu ke longisaka Yawu. Yina ke kieleka. Na yawu, Yawu ke katukaka na Nzambi. Samu na munu, ya ke Nzambi ya Ngolo nionso, mpe Yandi ke mutindu mosi mazono, bubu yayi, mpe ntangu nionso.

³⁰⁰ Yesu tubaka, “Mu me katuka na Tata, mpe Mu ke na kwendaka na Tata.” Ntangu Yandi kwisaka . . .

³⁰¹ Ntangu Yandi vwandaka Nzambi na kisika ya kuyuma, Yandi vwandaka Nsemo yina vwandaka pela. Mpe bantu yikwa zaba yawu? [Dibuundu me tuba, “Amen.”—Mu.] Yandi vwandaka Nsemo yina vwandaka pela, Dikunzi ya Tiya.

³⁰² Mpe Yandi me kwisa awa na ntoto, mpe Yandi me tuba, “Mu me katuka na Tata, mpe Mu ke kwenda . . . Mu me katuka na Nzambi, mpe Mu ke vutuka na Nzambi.”

³⁰³ Ntangu Yandi kufwaka, me zikama, me vumbuka na lufwa, mpe Paul na nzila ya yandi na Damas kutanaka diaka na Yandi, nani Yandi vwandaka? [Muntu me tuba, “Dikunzi ya Tiya.”—Mu.] Diaka Dikunzi ya Tiya. Yinga, tata.

³⁰⁴ Yinki Yandi salaka ntangu Yandi vwandaka awa na zulu ya ntoto? Yinki Yandi salaka ntangu Yandi kutanaka Paul? Wapi mutindu Yandi fidisaka yandi? Yandi fidisaka yandi na profete yina tubilaka yandi wapi mutindu ya kubotama, yina tubilaka yandi yinki ya kusala; yina tetikaka maboko ya yandi na zulu ya yandi mpe belusaka yandi, yina tubilaka yandi ti yandi monaka vision.

³⁰⁵ Yesu kaka yina ke awa bubu yayi, ke na kusalaka bima kaka mosi, mpe diaka kaka Dikunzi ya Tiya, yina ke na kulongisaka kima kaka mosi, mpe ke na kusingisaka yawu na nzila ya Ndinga ya Yandi, mpe na nzila ya bidimbu mpe mambu ya ngitukulu. Mu ke na nsayi mingi na kuvwanda Muklisto, mu zaba ve yinki ya kusala. Mu ke na mayangi ti beno ke kieleka Miklisto.

³⁰⁶ Mpe beno, tabernacle awa, mu tubaka na beno ti beto ke soba nkumbu ya yayi. Ya ke ke kulunga ve ti yawu kuvwanda Branham Tabernacle. Yina ke kaka muntu, beno me mona. Beto ke soba nkumbu ya yawu, kusala yawu nkumbu yankaka. Beto ke kuma kuna, na ntangu fioti. Mu zola kaka yawu

kuvwanda dibuundu ya Nzambi ya moyo. Mu zola yawu ve Methodiste, Baptiste, Presbyterien, Pentecote. Mu . . .

³⁰⁷ Bantu nionso yina, mu zola bawu nionso na ntima ya munu. Mu zaba ve nani ke nani. Mu lenda tuba na beno ve. Mu fwana kaka kulonga Ndinga. Mu ke losaka mpwasa mpe mu ke vutula yawu. Ya kele na bakiula, mpe ya kele na bankala-bumi ya masa, mpe ya kele na banioka, mpe ya kele na bambisi, mpe. Yina me tala Nzambi na kuzenga yawu. Mu ke benda kaka mpwasa, mu ke longka kaka Ndinga mpe mu ke vutula yawu, mpe mu ke tuba, “Bawu yayi, Mfumu, na kizunga nionso ya diziku. Nge zaba Bantu ya Nge; Nge zaba bawu katuka mbatukulu. Mu zaba ve nani ke nani. Nge zaba, na yawu ya me tala Nge, Mfumu. Yina kele ya kulutula yina mu lenda sala. Mu ke luta awa mpe mu ke losa mpwasa kisika yankaka awa, mpe mu ke kotisa nkonga yankaka. Yina kele nionso yina mu lendaka sala.” Mbote.

Oh, mu ke na nzila ya yinzo,
 Mu ke na nzila ya yinzo;
 Yinzo ya munu ya Mazulu kele kitoko mpe ke
 sema mingi,
 Mpe mu ke na nsatu ya kukwenda kuna.

³⁰⁸ Ntangu yayi beno bambuka moyo, muntu nionso yina zola kuzwa dilaka, bokila kaka Tata Mercier awa: BUtler 2-1519. [Numero ya alo-alo me soba.—Mu.] Beto ke vwandaka na kiese na kumona beno. Kana ba ya beno ya luzolo kwisa, ti bawu fwana kuvutuka na mbangu na yina mvumbukulu ke na kulandila. . . Ntangu yayi mu ke, katuka nkokila yayi, mu ke kwenda vwanda munu mosi, mpe mu ke kwenda samu na bilumbu zole ntangu yayi, na kuvwanda munu mosi.

³⁰⁹ Mu ke kota kaka kuna mpe mu ke kota na kutanga, mutindu yayi, “Mfumu, Nge kele pene-pene ya munu. Mu zaba ti Nge kele awa. Mpe Ndinga ya Nge ke tuba ti Nge ke belamaka na bayina ke belamaka na Nge.” Mu ke landila na kusambila mpe ke kyelola tii mu ke mona Dikunzi ya Tiya yango kubanda na kutambula. Kuna mu zaba ti ya me yilama. Na manima mu ke kwenda na kisika ya kulonga samu na lukutakanu ya kubeluka ya nzutu, samu na kusambila, mpe kusala yina mu lenda sala samu na kusadisa bambevo mpe ba ya mpasi.

³¹⁰ Beto me tonda bumbote ya beno nionso ntangu yayi. Mpe na yina beno ke kwisa, beno kwisa na kukwikilaka, mpe beto ke na kvingilaka na kuzwa lukutakanu ya nene. Mu zola kutuba yawu. . .

³¹¹ Mpangi Jeffries, yandi kele awa na nkokila yayi? Beto zola kuzitisa Mpangi Jeffries mpe kisalu ya yandi. Mu banza ti yandi me vutuka na bitumbu, mpe nionso yina.

³¹² Kiese na kumona Mpangi-bakala mpe Mpangi-kento Wright, mpe mingi ya beno awa.

313 Mpe mu vwanda me mona muzonzi Robertson awa, ntama mingi ve, kukota ntama mingi ve. Mu zola kutonda yandi na nsangu ya yandi—ya yandi yina yandi pesaka kilumbu yankaka yina. Muntu ve tubaka nani ya vwandaka. Yina vwandaka nsoni. Yandi pesaka nsangu mosi ya mbote mingi na zulu ya profesu, kima ya mutindu yina mu me longa na nkokila yayi.

314 Mpe, na yawu, na manima ya vwandaka na kisadi mosi yankaka awa na suka yayi, to mazono na nkokila, Mpangi Smith, ya dibuundu ya Methodiste. . . to ya Dibundu ya Nzambi, yina kele ntama na awa ve. Mu zaba ve kana yandi kele awa na nkokila yayi, to ve. Kana beno telama na kisika ya kulonga yayi mpe ti beno kutala na nsuka mutindu yayi, ya kele mpasi na kuswasikisa; ya kele plat, beno me mona, mpe beno lenda ve kuswasikisa. Kana beno kele awa, Mpangi Smith, beto me zitisa nge.

315 Mpe ya kele ve, ya kuvwanda awa, mwa mpangi yayi ya bakala ya Georgia, yina kele ya kuvwanda na manima awa pene-pene ya Mpangi Collins? [Mpangi Neville me tuba, “Yinga.”—Mu.] Kiese na kumona diaka nge awa na nkokila yayi, mpangi.

316 Mpe ba yankaka ya beno, beno nionso, beno zaba nani beno kele.

317 Mu banza ti awa yayi kele mpangi-kento mpe ya bakala bayina kwendaka sambila samu na mwana-kento kilumbu yina, kaka awa, dokotolo ya kuvwanda awa na lweka yayi. Mfumu kusakumuna beno, dokotolo.

318 Ntangu yayi, lemvo ya beno beno tala mpasi ve samu na muntu, beno bisadi mpe bankundi, samu ti mutindu ya kusungama mu me nata yawu mutindu ya ngolo yina mu lendaka. Yayi kele tabernacle ya beto. Ya kele na yina beto ke teleminaka, mpe beto zola kuvwandisa Yawu mbote na Ndinga yayi, mpe kuningisa bawu na Yawu. Kuna, kana beno basika na ndilu, beto ke vutuka mpe ke tuba, “Beni zabaka yawu mbote. Yawu yayi na bande.” Beni me mona? Beni bawu yayi. “Yawu yayi na bande.”

319 Beto ke na mingi ya kulutila diaka yina beto zola kulandila kuna, Leo. Kasi, kasi beto. . . Beni me kuzwa mingi. Beni kangama na Yawu, mpe beto ke baka yankaka ya Yawu na manima ya mwa ntangu. Mutindu muntu yina, vwandaka kudia pasteke, tubaka, “Ya vwandaka kieleka mbote, kasi ndambu ya yawu kele diaka.” Na yawu beto ke na Yawu ya kulutila mingi, diaka, yina ke na kwisa.

320 Mfumu kusakumuna beno, mingi awa. Na yina beto. . . Beto ke banda kisalu ya mbotika malu-malu yayi. Ya kele kieleka, Mpangi Neville? [Mpangi Neville me tuba, “Ee, mu banza mutindu yina.”—Mu.] Ya kele na muntu awa yina ke kuzwa mbotika malu-malu yayi? Beto ke kipe ve nani beno kele; beto kele—beto kele awa samu na kubotika. Beni telemisa maboko

ya beno, bayina ke kuzwa mbotika. Muntu mosi, mu banza ti ya vwandaka . . . Awa ya kele na mama awa. Mpe ya vwandaka na muntu yankaka? Ntangu yayi, awa samu na bawu zole babakala mpe bakento beto ke na bilele.

³²¹ Awa, beto ke na kutubaka ve ti, “Beno bika dibuundu ya Baptiste. Ti beno bika dibuundu ya Methodiste.” Beto me tuba yawu ve. Beno vutuka na dibuundu ya beno. Kasi kana beno me kuzwa mbotika ntete ve landila Masonukwa, na Nkumbu ya Mfumu Yesu . . . Kaka na Nkumbu ya “Yesu” ve, awa. Na Nkumbu ya “Mfumu Yesu Klisto,” yina kele Masonukwa. Mbotika ya beno kele ya yimbi.

³²² Mu zola mambu ve ntangu mu ke kuma na mwila. Mu zola nionso kuvwanda mbote mutindu mu zaba, ntangu mu ke simba tike yango, beno me mona, samu ti mu zola kumata na kati na ntangu yina. Mu ke longa beno na kusala mutindu mosi.

³²³ Beno vutuka na dibuundu ya beno. Ya me tala, beno na Nzambi. Yina kele nionso yina mu lenda tuba na beno.

³²⁴ Kasi ata muntu ve na kati ya Masonukwa kuzwaka mbotika ntete na konso mutindu yankaka kasi na Nkumbu ya “Mfumu Yesu Klisto.” Mpe bayina kuzwaka mbotika, ba tubaka na bawu na Santu Paul, yina tubaka, “Kana Wanzio longa diambu yankaka, bika ti yandi kuvwanda ya kusingwa.” Yandi tubaka na bawu na kwisa kuzwa mbala mosi diaka, mbotika, na Nkumbu ya “Mfumu Yesu Klisto.” Yina kele kieleka. Mpe yandi salaka yawu. Mpe yina yandi salaka, yandi me pesa beto kusalu ya kusala yawu; ya kele yina beto ke sala, Nzambi zola.

Beto ke kwikilaka na kusukula ya makulu. Beto ke kwikilaka na kominyo.

³²⁵ Beto ke kwikilaka na Kwizulu ya zole ya Klisto, na bakumona, na nzutu ya nsuni ya Mfumu; Mpeve ve, kasi nzutu ya nsuni ya Mfumu Yesu yina ke kwisa diaka na nkembo.

³²⁶ Beto ke kwikilaka na mvumbukulu ya nsuni ya mafwa, samu na kuzwa nzutu, ya buboba mpe ya mifutu ve mutindu beto ke kwendaka na ntoni; kasi yina ya malu-malu, ya kiese ya nene ya buntwenya, samu na kuzinga ntangu nionso.

³²⁷ Beto ke kwikilaka na moyo yina ke kufwaka ve, ya kieleka mpenza. Beto ke kwikilaka ti ya kele kaka na mutindu mosi ya Luzingu ya Seko, mpe yina kele Luzingu yina beno ke kuzwaka na Klisto Yesu. Yina kele nionso kieleka.

³²⁸ Na yawu, beto ke kwikilaka ve na kitumbu ya Seko. Beto ke kwikilaka na tiya ya difelo, soufre yina ke na kunyenga, kasi beto ke kwikilaka ve ti yawu ke nyengaka ntangu nionso; kana yawu kele mutindu yina, beno kele na Luzingu ya Seko. Ya kele kaka na Luzingu mosi ya Seko; Yina ke katukaka na Nzambi. Mpe yina kele kieleka. Beno ke nyenga, na kutala difuku mosi ya bamvula, mafuku kumi ya bamvula, mu zaba ve, kasi beno lenda

ve kuzwa Luzingu ya Seko. Beno lenda ve kunyenga ntangu nionso. . . Beno lenda kunyenga ntangu nionso, kasi ya Seko ve. Beno me mona, ya kele na luswaswanu na kati-kati ya Seko na ntangu nionso. *Ntangu nionso* kele ntangu nionso mpe ntangu nionso, kuvukisa, zola kutuba “kitamina ya ntangu.” Kasi, Seko, beno ke na kitumbu ya Seko ve.

³²⁹ Beno ke na Luzingu ya Seko, samu ya kele na mutindu kaka mosi ya Luzingu ya Seko. Mpe yandi yina kele na Luzingu ya Seko, ke zingaka mpe kele ya kusakumuna ntangu nionso na Nzambi.

³³⁰ “Kasi mwela yina ke sumuka, kele yina ke. . .” Yinki? [Dibuundu me tuba, “. . . kufwa.”—Mu.] Ya kele kieleka. Kuna, ya kele na Luzingu ya Seko ve. Kieleka. Ya ke—ya ke na kitumbu ya yawu, kasi Luzingu ya Seko ve.

³³¹ Na yawu, beno me mona, ya kele na bima diaka mingi ya kutuba, beto ke baka yawu ntangu yankaka. Mfumu sakumuna beno.

³³² Ntangu yayi bika beto yimba nkunga ya mbote ya ntama yayi, na yina mpangi ya beto ya kento ke kwenda na kati kuna. Mu banza ti mama yayi awa lenda. . .

³³³ Rosella, yina kele mama ya nge? [Mpangi-kento Rosella me tuba, “Yinga.”—Mu.] Oh, ya kusakumuna vwanda ntima ya nge! Kiese na kumona nge, mpangi-kento, kusala yawu. Yina kele mbote mingi.

³³⁴ Rosella Griffin, mosi ya bantwenya ya bankundi ya mbote yina kele na beto. Yandi kele ntwenya ya kento yina vwandaka munwi-malafu; samu na bantu yankaka ya beno awa, yandi lendaka vwanda nzenza. Rosella ke kipe ve ti mu tuba yawu. Ntangu yandi kwisaka na kisika ya malongi kuna na—na kisika. . . awa na Indiana. Beno me mona ntete kitende, yandi vwandaka mosi ya yawu, munwi-malafu ya disu ya mbote ve. Kisika, badokotolo yiya ya nene ya Chicago tubaka yandi kele. . . Ba-alcoolique Anonymes, mpe nionso yankaka yina, bikaka yandi. Kasi nkokila mosi ntangu yandi kwisaka na lukutakanu, Mpeve-Santu nyangulaka luzingu ya yandi mpe tubaka na yandi kaka kuna. Yina sungikaka yawu.

³³⁵ Beno tala yandi ntangu yayi, mu banza, makumi tatu na kima ya bamvula, yandi ke monana mutindu kumi na nana; ya zola, ntwenya ya kento ya kitoko. Katuka yina ata mbala mosi ve ti yandi me mekaka whisky; nsatu ya yawu kele diaka ve. Yandi ke na kuzinga samu na Klisto, ke kwenda bisika nionso na babala-bala, bisika nionso, ke pesa kimbangi ya nkembo ya Nzambi, na bansumuki mpe binwa-malafu, na bisika ya nsangu ya yimbi, mpe nionso yankaka yina, bisika nionso na Chicago, yandi ke na kusala kima samu na Mfumu.

³³⁶ Yandi kuzwaka mbotika na Nkumbu ya Mfumu Yesu, mpe mama ya yandi me kwisa na nkokila yayi samu na kusala

mutindu mosi; kana Nzambi lendaka belusa yandi, kana Yesu lendaka belusa yandi. . . “Nionso yina beno lenda zonza to kusala, beno sala yawu nionso na Nkumbu ya. . .” [Dibuundu me tuba, “Yesu Klisto.”—Mu.] Ya kele yina Biblia me tuba. Ya kele kieleka.

³³⁷ Mbote, ntangu yayi beto ke banda kisalu ya mbotika. Beto ke kufwa minda baminuti fioti na yina beto ke kubama samu na kisalu, samu na mbotika, mpe—mpe na manima beto ke vingila na kuzwa ntangu ya mbote na Mfumu.

³³⁸ Beno ke sala kisalu ya mbotika na nkokila yayi? Mbote, mbote ti—mbote ti beno kukubama. Mpe mu ke banda, mu ke twadisa minkunga mpe nionso na yina beto ke landila kuna. Na yina bawu ke. . . [Mpangi Neville me tuba, “Dok, ya kele na bilele na manima awa?”—Mu.] Bilele ya mbotika, Dok, nswalu. Mbote.

³³⁹ Bika beto yimba mosi ya ntama ya mbote yayi. . . [Mpangi Branham ke na kutwadisa kuyimba ya kimvuka, na yina Mpangi Neville ke na kubotikaka mpangi-kento—Mu.]

³⁴⁰ [Kisika ya mpamba na bande—Mu.] Mpe ntete na kusala yawu, na kuvutukaka, beto fwana sala yinki?

Bayintu ke yikama na Nkumbu ya Yesu,
Beto ke fukama na makulu ya Yandi,
Ntinu ya bantinu na Zulu, beto ke byadisa
Yandi,
Na nsuka ya nzietelo.

Mbote, beto telama!

Baka Nkumbu ya Yesu na nge,
Nge mwana ya mawa;
Ya ke pesa nge kiese na mbote. . .

³⁴¹ Mu ke tuba na beno yinki beto ke sala. Beno baluka mpe beno pesa mbote na muntu kuna, mpe beno tuba, “Mbote, mpangi-bakala. Kieleka mu ke na kiese na kuvwanda na lukutakanu na nge.”

Nkumbu ya ntalu, Oh ya mbote!
. . . mpe kiese ya Mazulu;
Nkumbu ya ntalu, Nkumbu ya ntalu, Oh. . .



NKUNA YA NIOKA KNG58-0928E

(The Serpent's Seed)

Nsangu yayi ya Mpangi William Marrion Branham, kulongamaka na Kingelesi, na nokila ya Lumingo, na kilumbu ya 28 ya Ngonda ya yivwa, na mvula 1958, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org